

第三十卷

第三十卷

列傳
下

彭炳基抄

於炳基繕寫
林喬松登記

計州撰

列傳

莆田縣志卷

列傳十

明 林廷綱

吳 源

林長懋

林

文曾 孫希範

柯

潛

嚴

洽

陳 音

吳希賢 曾孫三畏

戴大寶

林文俊

林廷綱藻裔洪武初詔郡學弟子員學優者入國子監廷綱在選太祖親試擢
史科給事中盡言直諫因賜名恒忠仍賜上尊陞中書舍人兼太守贊善與
宋璫揭樞同知制誥詞藻聲華愈出人上又薦郡人吳源徵拜四輔夏官嘗
侍遊江間殿太祖首倡云江間小殿與雲齊梁上新添燕子泥廷綱奉旨足
成之曰雉扇晚開紅日近龍衣春濕彩雲低旌旗影裡繞貅息斧戟門前騏
驎嘶簪筆詩成同拜舞太平天子試新題又承旨作春江漁父圖詩題於內
殿云浩蕩乾坤一釣徒絲綸終日倚菰蒲桃花浪暖魚堪繪桑柘村深酒可
酌歲月不知蓬髮改江湖真與世情疏鮫鱓不入君王召四海于今誦帝謨

甚蒙寵眷後以事忤旨賜自盡上尋悟然已無及矣命葬太平門外立石旌之有林舍人詩若干卷

吳源字性傳早孤力學通諸經尤長於易惇禮好義士大夫皆推下之至正末舉泉州路訓導洪武三年復以明經教授興化府十三年以林廷綱薦與杜穀龔穀趙民望李祐俱特詔徵為四輔官兼太子賓客位列公侯都府之次屬降制諭欲其均調四時源司夏季中旬每講明治政必以得賢才敦教化養黎元為圖治之本甚見嘉納上遊東苑命五人侍相與聯句為七言近體詩一章上首倡曰踞盤龍虎肇英豪社穀繼曰五色卿雲捧日明源繼曰王氣堂堂垂景象龔穀繼曰民風樂爾見昇平民望繼曰山河百二金陵最枯繼曰宇宙千秋帝業成上復繼曰暗憶六朝興替事社穀足之曰禎祥未盡又加禎詩成恩禮優洽冠於一時源尋以老請歸明年上念其賢後賜訓詔曰曩者朝臣薦卿學行足用召卿至庭官以四輔而卿告年老艱於步趨遂

命還鄉今日朕選公侯子弟入國子學司業員缺生徒無所矜式卿其為朕
一來講道授經無筋力之勞而有成就後學之益亦儒者之素志也其速來
勿有所讓源復赴京授國子監司業未幾卒於官著有黃陽名公事述若干
卷宏治府志採用之

林長懋字景時永樂乙酉鄉薦歷德清南昌教諭遷青州府教授與戴綸俱侍
皇太孫說書擢編修始成祖命太孫習武事太孫亦雅好之時出騎射長懋
與綸以太孫春秋方富不宜荒學問而事遊畋時時進諫仁宗初太孫立為
太子進中允仍侍講讀宣宗即位扈從諸臣皆進官長懋再行後出知鬱林
州其二弟宦學京師奉母因乞降繁難京職時綸擢兵部侍郎以諫獵忤旨
與長懋同坐怨望並下錦衣獄綸箠死而長懋繫獄十年英宗立乃得釋復
其官還知鬱林疏溝渠禁淫祀撫下以恩而自奉極儉朝夕惟食鹽菜人呼
為林鹽菜卒葬鬱林州人歲為增土立廟祀之弟道節永樂乙未進士授

刑部主事長懋下獄時調平樂通判遷知瀘州廉介公勤尤如意學校陞鶴慶軍民府以母喪歸

林文字恒簡九牧筆後宣德五年廷對第三授翰林院編修正統初預修宣宗實錄成轉修撰時年已五十歷官九載謹循常調未幾丁內外艱服闋復除原職景泰三年陞春坊諭德兼翰林侍講四年修歷代君鑑成七年修天下郡志陞庶子仍兼侍講天順元年罷康定時宮僚文改尚寶司卿兼職如舊時翰林應轉學士者七人上疑其多兵部尚書陳汝言進曰唐有十八學士是不為多遂并拜學士四年請老上謂內閣李賢曰林文老成忠厚不可放去仍留供職八年憲宗即位以舊講讀官陞太常少卿兼翰林侍讀學士再乞致仕歸文雖年逾七十然神觀清爽應對精明安靜守禮接人無大小皆以誠意朝野士大夫踵求詩文酬之無倦色體格溫淳自成一派播紳推為醇儒咸自謂不可及也兩考會試一讀廷試卷學者稱為上林先生卒年八

十贈禮部左侍郎謚襄敏遣官諭祭營墓子孫科第見選舉志 希範文曾
孫由鄉薦為漢陽府同知調岳州府有清操督賦平江無毫髮之擾惠利及
人終楚府長史

柯潛字孟時幼警敏嗜學十歲喜賦詩正統甲子鄉薦景泰辛未廷對第一授
翰林院修撰明年陞春坊中允兼修撰預修歷代君鑑天下郡志成累受賞
賚七年陞司經局洗馬天順元年例罷宮僚改尚寶司少卿兼職如故充東
宮講官八年陞翰林院學士成化元年修玉牒三年修英宗實錄陞詹事府
少詹事兼翰林院學士四年命日侍經筵會孝宗崩上以合葬裕陵為疑下
群臣議內閣彭時等奏宜合葬孝宗居左太后於千秋萬歲後居右未報潛
曰朝廷大事臣子大節舍是美所用心與修撰羅璟一再疏爭竟得如議未
幾丁父憂踰年母歿既葬詔起復為國子祭酒懇求終制九年服闋將赴京
得疾卒年五十一遣官諭祭營墓潛曾貌偉俊容止雅飭接人外若樂易而

內實獨介鄰郡有中貴人寵冠一時士大夫欲求連化者爭趨其門潛獨不
往天順中李文達賢欲引共事以資淺而止成化初吏部屢薦入內閣不果
典兩京試者一禮部會試者再為學士時即院中後圃構清風亭鑿池蒔芙
蓉植二栢於後堂後人稱其亭為柯亭栢為學士栢院中有井學士劉定所
鑿翰林中并稱為柯亭劉井云所著有竹岩稿子宗文以蔭授中書舍人

嚴淦字宗源景泰甲戌進士改庶吉士授翰林院編修同修寰宇志拜御史督
南畿學政嚴考校絕請託權門要路謗憾雖多弗恤也陞浙江副使乃兼理
南畿學政以不便行事改湖廣提學秩滿陞廣東按察使遷湖廣右布政使
暨轉左命下而淦卒矣淦性狷毅泚官守法與人不苟合先輩曾景修教授
德安父子繼歿僅一孫隨母流落淦物色得之資其歸以奉曾祀

陳音字師召淳後天順八年進士選庶吉士授翰林院編修分修英宗實錄成
進侍讀擢南京太常少卿命兼掌南京翰林院事陞本寺正卿卒音為人和

易坦率細事無不可至分別義利則界限截然在翰林院時嘗上疏陳時政數事一曰養君德臣聞養德之要莫先於講學講學之功莫要於好問陛下雖日御經筵以勤聖學然勢分尊嚴上下情隔上雖有所疑而未嘗問下雖欲有所陳而不得盡臣願陛下退朝之隙擇儒臣有學行者日引對便殿或從容賜坐或旁立咫尺搜求經典有疑輒問務使聖心渙然開明則以之正心以之正百官正萬民億萬年之業基於此矣二曰進人才臣聞人才難得自古為然國家養士百年于茲其可用者又未嘗用之姑舉所知者如致仕吏部尚書李秉侃侃公忠忘身殉國雖小過不能無而大節則可許養病翰林院修撰羅倫編修張元楨皆抱經濟之才鬱不得施故託疾引退以免素餐之恥新會舉人陳獻章所學醇正所養充大臣願陛下起李秉復為吏部尚書起羅倫張元楨復為侍從徵陳獻章寄之臺諫則賢才得用而治教日昌矣三曰開言路臣聞明目達聰處治以貶從諫弗弗殷業日隆今朝廷

雖置言官多緘口不言者以常言者有擯斥之辱也臣願取回判官王徽評
事章懋等復其舊職以彰陛下天地之量仍飭自今臺諫凡政事得失民生
利病一切真言無隱言雖狂皆不加之罪則求言以誠事無壅蔽而邦家永
太平之祚矣四曰聞異端臣聞異端者正道之反害道之大者也當今號佛
子法王者無寸善可述稱真人者無一長可取名位尊陸賞與溢濫臣願陛
下降其位號杜其思賞仍詔自今始有造寺觀者悉置諸法永為定制則妖
妄絕正道明而民興行矣權璫黃賜有母喪省寺院監咸赴弔翰林亦有議
欲行者音奮曰堂堂翰林相率而拜內豎之門奈天下笑何議遂止西廠初
建太監汪直方用事勢甚張其爪牙韋英夜率邏校入兵部主事揚仕偉家
收縛仕偉益掠其妻衆味懼莫測音與比居亟乘墉大呼曰汝何人乃擅辱
朝臣其人曰爾何人乃不畏西廠曰我翰林院侍講陳音也懼汝輩壞國法
禍福非所憚其人為少戢大學士劉吉起復音復遺書止之其後當路有缺

吏部欲擬音吉曰陳某腐儒不可用其為少卿滿九年乃進卿音學問深博為古文肆筆而成率平實有理致遺藁數十卷子舉華孫須樂見送舉志須孝廉授承天通判

吳希賢字汝賢祭齋精毛氏經天順甲申進士改庶吉士同年李東陽以敏贍稱希賢與之齋名授檢討預修英宗實錄有貴冢子寇姓者密以賄丐希賢致羊詞於其父希賢拒之曰苟為此他日何以見董狐於地下耶進修撰陞左春坊左諭德南京翰林院侍讀學士卒於官希賢性豪邁負奇氣於人少所許可兩考會試所得多俊偉士為文章意新語壯有聽兩亭稿四卷三畏字曰寅希賢曾孫嘉靖癸卯鄉薦官寧海教諭擢嵎縣令縣故無城三畏始議築之城成而倭至竟不能犯遷廣信同知歸以子獻台贈江西左布政使

戴大賓字寅仲三歲學語時即能屬辭若有神授兼通五經年十三舉宏治辛

西鄉試第三人正德戊辰會試第二廷對第三除翰林編修對策流播海內
逆瑞劉瑾无女有才姿瑾養為己女為求快婿見大賓必欲致之乃為飭婢
舍具鵝粟廝養大賓揣瑾吳時必汙己乃縱酒佯狂醉後常喃喃詈瑾又日
鞭笞瑾所貽廝隸廝隸怨乃諧大賓輕薄非遐器瑾意漸衰會大賓聞母訃
奔喪歸卒于途瑾後以闕中解元某娶其女解元年方二十有俊才瑾誅解
元坐黨削籍

林文俊字汝英正德丁卯鄉試第一辛未進士改庶吉士授編修擢春坊贊善
充經筵講官世宗見其玉質矩容音吐金石意屬大用擢貴擢翰林吳已者
補外文俊賴聖眷以免吏部會推南國子監祭酒凡四上及文俊始允改北
祭酒奉勅校定二十一丈殿梓以獻是為北監本值來與臨幸文俊以尚書
講說稱上意賜衣二襲凡南北六館諸生罔不肅遵規條雖貴游子弟亡得
躡序橋門之內肅如也陞南京禮部侍郎轉吏部侍郎逾歲病疽卒廢一子

加贈禮部尚書賜祭葬初議謚曰良曰恪御筆特改曰文修異數也文俊涵
養養完粹誠實不期待人有恩每為諱過或非意相干亦無愠色念父當日躬
耕自給因名所居堂曰力本厯官二紀清約如寒士士論翁然歸之有方齋
存稿若干卷子宗翰以廢官高州通判

列傳十一

明

翁世資

陳

俊

彭

韶

林

俊

翁世資字資甫父璞舉鄉貢官至翰林院檢討掌國子監助教事世資正統七
年進士授戶部主事政暇輒翻閱舊案究其利弊涉獵廣記明習國典嘗以
部檄往通州監收軍士冬衣布花因奏言所收貯庫藏轄於通州諸衛宿弊
極多宜改屬有司從之丁外難歸景泰元年尚書金濂以時方多難求可裨
謀議者因奏起復世資固辭終制明年服闋除戶部陞郎中凡有大議必與
商推會江南水災遣往勘驗因奏免應天太平興國安慶廬州等府及建平

宣城等衛稅糧五千餘萬石粵東倍之并撤所司賑恤天順元年充會試同
考時大臣多罷上謂姚夔翁世資可大用遂擢夔禮部世資工部俱右侍郎
四年命中官往蘇杭嘉湖造上供文綺七千疋未完又奏別遣官督并加造
七千疋世資謂東南水潦民苦艱食宜搏節以甦民困議減其半尚書趙榮
右侍郎霍瑄難之世資請身任其咎乃連署以諫疏上帝疑其要譽詰主議
者下世資錦衣衛獄謫衛州知府至則決疑獄新廟學修石鼓書院立便民
倉百廢俱舉衛帥有庠法者世資稍抑之遂誣其怨望逮至京上不直衛
帥復世資官成化初陞江西左布政使適廣寇發王師南下議令江西轉餉
需役十萬人世資令齎銀就廣中糴之民得不擾以右副都御史巡撫山東
歲飢發倉儲五千餘萬石以賑撫流亡全活者百六十二萬人召為戶部右
侍郎八年遷左侍郎十三年提督京通等處倉場明年進本部尚書世資久
處財賦之地凡劑量盈縮罔不懸合事宜以年老引退詔加大子火保致仕

卒贈太子少傅居官四十餘年家無餘才所著詩文有水崖集若干卷兄世用正統戊辰進士官終貴州參議莆人父子兄弟同時登朝自世資始子泗以廕授光祿署丞洪泳見送舉志

陳

俊字時英正統丁卯鄉試第一戊辰登進士第授戶部主事丁父憂服闋仍

除舊職景泰甲戌差天津等衛征杖青草俊言舊負未蠲新額存積人不能堪詔減三十五萬束蘇松諸郡負上供多復受委往徵不數月告完尚書金濂以為能俾典指曹章奏歷郎中天順五年兩廣用兵俊督饋餉時州郡強破帑藏殫虛地鹽商越境令每引輸米二斗以餉兵公私使之丁母憂乞守制不允師還始奔喪總兵監軍合百金為贖却之服闋復任郎中成化初陞南京太常寺少卿時郎官久無拜少卿者俊以賢舉得之四年召為戶部右侍郎俊練習錢穀四方災傷邊鎮易餉奏議達至裁決成當尚書楊鼎深倚之京師大飢先後發大倉粟八十萬石平糶石值六錢豪猾來時射利俊請

糴以升斗為率過石勿與飢民獲濟尋議用兵河套勅俊赴湖南陝峽會巡撫諸臣畫鉤芻發帑金二十萬助之俊以邊庾空竭歲又不登榆林道險轉輸艱難乃發金於內地市易修西安韓城同官徑道以利飛挽師行無乏比凱還進俸一級歷吏部左侍郎九載秩滿擢南京戶部尚書尋改兵部參贊機務先是參贊之任不專屬兵部自薛遠後繼以俊遂為定制久之改吏部尚書請老不允賜羊酒寶鈔俾還任二十一年星變率九卿陳時樂二十事皆極痛切帝多采納而權倖所不便者終格不行明年再乞致仕詔加太子少保馳驛傳還逾年宏治改元以疾卒家無餘財訃聞遣官諭祭營奠謚康懿俊為人沉毅簡重孝友廉慎行之終身人無間言孫達之以貢為沉邱令遷淮安通判有惠政祀名宦祠

彭韶字鳳儀天順元年進士授刑部主事以憂歸成化初歷署員外郎時張岐以壽寧侯兄從外臺躡僉都御史入院韶疏岐險邪不可用乞召故尚書王

竑李秉侍郎葉盛忤旨下詔獄給事中毛弘等論救卒輸贖尋進廣東司郎
中外戚周或奏乞武強武邑民田不及賦額籍為閒田令詔借御史李琮覆
勘韶等周視徑歸上疏自劾曰真定田自祖宗時許民墾種即為恒產除租
賦以勸力農功臣戚家與國成休豈當與民爭尺寸地臣不忍奪小民衣食
附益貴戚請伏奉使無狀罪疏入詔以田歸民而責韶等邀名方命下詔獄
言官爭論救得釋俄而復有請荒田者上顧左右曰彼不見周或事耶奈何
又請是時韶與何喬新同官齊名稱為何彭遷四川副使有安岳扈氏焚滅
劉氏家二十一人定遠曹氏殺其兄一家十二人獄久不決韶一訊得實咸
伏辜進按察使盡撤境內汪祠王府祭英舊遺內官公私煩費奏罷之雲南
鎮守太監錢寧進金燈擾道路韶劾之不報十四年遷廣東左布政使薦陳
獻章得旨召闕劾鎮守太監顧恒非禮貢獻市舶太監章眷矯旨稱進奉庇
豪戶亂舊章珠池監丞黃福以進奉為名所至騷動錦衣衛鎮撫梁海本廣

州人歸採禽鳥花木輒稱貢儀為害尤酷海太監梁芬弟也芳見疏銜之構於帝調之貴州二十年擢右副都御史巡撫應天明年正月星變上言彗星示災見於歲暮遂及正旦歲暮者天道之終正旦者歲事之始此天心仁愛欲陛下善始善終也陛下嗣位之初禮正防微儉德昭用人慎邇年以來進奉貴妃加於嫡后喪寵其家幾與先帝后家埒此正家之道未終也監獄內臣數以萬計利源兵柄盡以付之犯法縱奸一切容貸此防微之道未終也四方鎮守中官爭獻珍異動稱勅旨科擾小民此持儉之道未終也六卿竝加師保監寺兼領崇階及予告而歸廩食與夫濫加庸鄙爵賞一輕人誰知勅此用人之道未終也惟陛下慎終如始天下幸甚芳輒從旁言韶每事沾名上直視芳不應芳懼伏地明年召入為大理卿未上又坐論內外官貢獻道改副都御史巡撫順天永年平二府均大興宛平昌平諸縣徭役勅鎮守中官陶弘罪孝宗即位召為刑部右侍郎庶吉士鄒智以危言傷時同湯鼎

不報又明年卒年六十六贈太子少保謚惠安正德初林俊疏言彭韶文學
經緯廉聞風貞正色立朝先憂為國謚不副行乞如魏驥吳訥葉盛改謚曰
文竟不行所著有名臣言行錄贊文集行于世子潘舉鄉薦卒

林俊字待用蘊後成化戊戌進士授刑部主事進員外郎時妖僧繼晚挾近倖
梁芳以祕術進被憲宗殊眷發內帑數十萬金建寺俊上疏曰臣聞修養之
說怪誕無徵佛氏之教幻妄無取故其事不見於堯舜禹湯之世其誣每見
於唐宋先儒之論史冊所稽不可混也謹按僧繼晚本一儉邪小人市井無
賴曩者猥借邪術欺誑楚府及事暴露乃竄身逃罪潛住京師多方夤緣誤
蒙聖眷疊賜異恩頃復發內庫銀數十萬兩蓋大鎮國永昌寺臣思陛下聰
明齋聖斷不為此必繼晚誣說謂此寺一建則聖壽益長國祚益昌以此囑
陛下耳不知以有用之財供無益之費國計且日削矣以陛下超三邁五之
資蹈唐憲梁武之轍聖謬且日損矣下人蚩蚩爭先事佛聖政且日壞矣居

民重遷工役不息人怨且日異矣臣謂不斬繼晚異日之禍殆不可言然縱
之者梁芳也梁芳傾覆陰狠引用邪妄排斥忠良乃復薦進繼晚陰求蓋寺
至飛語外人皆云本出聖意夫人臣善則歸君過則歸己今梁芳欲文已奸
而以過歸陛下即此一事已不容於誅矣今內而大臣外而百官以及閭井
之徒亦皆痛心疾首欲食繼晚梁芳之肉而不敢以言達於陛下者所惜者
官所畏者死耳使臣不復言則陛下終不悟祖宗在天之靈謂臣等何如人
天下後世謂臣等何如人東筆史官必識誚臣等恐將及陛下矣唯陛下留
神聽覽熟計而必行之天下幸甚忤旨下詔獄太監懷恩力救謫姚州判官
元日星變憲宗悟叙復南部孝宗立擢雲南按察副使鶴慶玄化寺稱有活
佛歲時士女會集爭先以金泥其面俊命焚之毀各屬淫祠三百六十餘區
撤其材修學宮擢湖廣按察使五年以災異上疏陳時政得失又言德安安
陸建王府及增修吉府工役浩繁財費鉅萬民不堪命乞循寧裏德府故事

一切省儉勿用琉璃及白石雕闌請著為例不從九年引疾不待報徑歸久之薦起廣東布政使辭起南京右僉都御史督操江十四年正月朔奏晉地震水涌跡述古宮闈外戚內侍柄政之禍乞罷齋醮減織造清役占汰冗員止工作省供應節賞賜戒逸欲遠佞倖親賢人又請豫教皇儲因薦侍郎謝鐸少卿儲瑾揚廉致仕副使曹時中處士劉閔堪輔道報聞已屢疏乞休不許江西盜起命俊巡視親入賊巢勸諭渠首王武率衆聽撫請自効群盜悉平改巡撫江西乃更約束庶政一新建義倉義學義塚以阜俗甯藩宸濠貪暴俊屢裁抑之王請易琉璃瓦費二萬俊言宜如舊毋涉叔段京鄙之求吳王几杖之賜王怒伺其過無所得會俊以聖節按部遂劾之停俸三月尋以母憂歸守制武宗即位言官交薦江西人在朝者合疏乞還俊乃進左副都御史再撫江西遭父憂不果正德四年起撫四川眉州人劉烈倡亂敗而逃諸不逞假其名剽掠俊繪形捕莫能得會保寧賊藍廷瑞鄔本怒廖忠等繼

起勢益張轉寇巴州猝遇之華壘軍與直抵其巢宣諭賊頓首伏地既約日
降而露兩溪溢賊失期疑阻遂分黨謀據州縣要害川兵脆不能支俊欲斬
將領以徇諸軍股栗願立功自贖於是連戰皆捷擒廖惠而廷瑞奔陝西西
鄉越漢中三十六盤至太巴山官軍追及復大破之移師擊瀘州賊曹甫且
遣人招諭甫佯聽令使弟瑄劫如故指揮李蔭斬瑄首賊遂移江津分七營
將攻重慶俊發酉陽播州土兵助蔭元日賊醉無備啣枚而往斬曹甫薙馭
餘賊遁入民家焚之盡斃乘勝搗老營指揮汪洋等中伏死官軍乘勝進圍
之俘及焚死者二千有奇本恕廷瑞為永順土舍彭世麟所擒俊論功進都
御史甫黨亡命恩南復攻南川綦江以窺瀘州俊益發土兵令副使何珊李
鉞等敗之捷聞璽書獎勵俊在軍與總督洪鐘議多左中賁子弟欲冒從軍
功輒禁止之御史俞縉走避賊而僉事吳景戰歿縉怒欲委罪俊遂劾累報
首功賊終不滅加鑿井毀寺逐僧徒迫而為賊於是被旨切責餘寇四方收

合數萬人來攻江津俊追逐與戰大捷先後擒斬凡二萬餘級聞復賚金幣初播州土官楊友與其兄愛爭襲已覆奏革其宣撫職乃厚賂中貴劉瑾求復俊極言不可與瑾忤瑾誅得無事俊又奏瑾雖誅權猶在內倖安知後無有瑾者請擇取宗室育之宮中召用先朝舊臣劉健謝遷等以修復舊政用事者皆不悅屬俊奏請以舊職歸田即可其奏言官交章請留不報俊歸士民號哭追送時正德六年十一月也世宗即位起工部尚書在道改刑部尚書數引疾不許且促其來俊疏請帝親近儒臣正其心以出號令用澤樸為天下先初詔所革無遷就以廢公議既抵京師侍經筵會暑月輟講俊疏學貴緝熙不宜輒罷舉祖宗勤學故事以誅時俊年已七十寓止朝房示無久居意數為帝言親大臣辨異端勤聖學節財用朝有大政必侃侃直陳中外想望風采中官葛景等奸利事覺為言官所糾詔下司禮監察訊俊言內臣犯法司不得訊是官府異體也乞下法司公訊以昭平明之治都督劉暉

下獄俊議當以交結朋黨律言與許泰同罪請斬以謝天下廖鵬廖鑑齊佐
王斌論死屢詔緩刑俊乞亟行誅又劾谷大用占民田萬餘頃不聽中官
崔文家人索匠師賄不獲嗾文杖之幾死下刑部治未決而中書省撫鎮司
俊留之不遣明日又力爭帝怒責陳狀俊言祖宗以刑獄付法司以緝獲付
鎮撫訊鞠既得猶必付法司擬罪未有奪取未定之囚反付推問者文先朝
漏奸罪不容誅茲復干內降臣不忍朝廷百五十年紀綱為此輩壞亂帝憚
其言乃不問俊以耆德起田間持正不避嫌既見格遂授疾乞休疏八上乃
允立朝僅十四閱月加太子太保賜璽書乘傳歸陛辭賜酒饌寶鏹如制俊
數爭大禮與楊廷和合嘗上言推尊所生有不容已之情有不可易之禮因
輯堯舜至宋理宗事凡十條以上至是大禮議定得罪者或杖死俊在籍從
疾中上書言古者鞭撻之刑辱之而已非欲靡爛其體膚而致之死也又非
所以加諸士大夫也成化時臣見廷杖二三臣率容厚綿底衣重氈疊裹然

且沈卧久了得痊正德朝逆瑾竊權始令去衣致末年多故死成化宏治時
惟叛逆叔盜下詔獄始命拷問他犯但言送問而已今一槩拷問亦亦故事
自去歲舊臣斥逐殆盡朝署為空乞聖明留念既去者禮致未去者懋留碩
德重望如羅欽順王守仁呂柟魯鐸輩宜列置左右臣衰病待盡無復他望
敢効古人遺表之意敬布犬馬之心帝但下所司而已又明年丁亥疾且革
命子達草疏請懋聖學隆考治任賢納諫保躬導和且預辭卹典遂卒年七
十六後一年明倫大典成追論附和廷私削其官其子達以士禮葬之俊歷
事四朝抗辭敢諫以禮進退始終一節隆慶初復官贈少保謚貞肅達正德
九年進士官至南京吏部郎中工篆楷能古文

列傳十二

明 方良永弟良節

孫伙績

伙階

林雲同

郭應聘

方良永字壽卿弘治庚戌與弟良節同登進士授刑部主事轉員外郎擢廣東

按察僉事瓊州賊符南蛇為亂總督劉大器檄攝海南兵備會諸道兵討滅之御史坐良永失利大器已入京為白於朝錄功領賞推補海北兵備既下車風裁凜然且盜望風解散惟黃李帥等不服一鼓擒之丁外艱歸正德初起服赴闕武宗不御殿朝見者例至左順門行頓首禮鴻臚既導如儀復謂良永傍揖中官劉瑾輩良永不顧徑趨出或勸良永謁瑾自免竟不在瑾銜之吏部除良永河南撫兵僉事瑾矯旨勒令致仕既去瑾怒未已會海南有奏訴人命者瑾欲因中以禍遣官勘問既會逮郎中周時敏力白良永無罪乃歸數年瑾敗起湖廣按察副使首禁官衙私買按積年牟利為民害者河南劇賊趙燧敗走湖湘聞削髮自匿以計擒之擢廣西按察使巡按御史朱志榮挾勢多為不法良永率二司舉發其奸罪至謫戍甫半載擢山東右布政使甲戌考察廷旌十六人良永與焉轉浙江左布政使裁抑織造內臣所省不貲寵臣錢寧賜姓朱謂之義子權勢震灼遣僕鬻鈔于浙索銀三萬

兩同列重建其意謀抑取于民良水爭之不得上疏曰國家財賦盡出東南
浙居其半故愛國必先愛民愛民必先愛財而浙之民之財尤當愛以惜朱
寧自出賤氓甘為民養陛下一旦假以義子寵躋諸公侯之列勢傾中外富
擬封居其親之也至矣為寧者粉身碎骨以圖報稱尚不能萬一乃忍擢取
陛下之民財戕陛下之邦本以自速其不臣之罪臣於正德九年十月初十
日到任即聞朱寧鬻鈔害人心甚惡之無何鎮守太監劉環語臣及三司曰
寧堂欵價意欲倍增何如臣茫無以對詢之先是分發十一府每欵一塊易
銀二兩傳報朱寧怪其太輕故欲增至四兩次日復語如初臣堅持不可環
離席曰我豈不知此事貽害百姓哉顧勢不得不為耳又次日復語如初竟
增至三兩臣退而思之有官守者不得其職則去心離憤激力不能救亦失
職也乃自劾求去遣此尸素繼聞新有禁例勢豪鬻欵害人者必罪臣竊喜
此事徐雷中止今數月矣例格不行有司徵價急於星火或緣為奸倍而又

倍椎膚剝髓民不堪命新鎮守太監王堂知民怨且作亦戚然不安乃出異辭謂寧堂好人初不知鬻欵之難如此苟豫知之必不為今業已為之可以已完二萬四千兩截解少慰其意二臣所稱寧堂指朱寧也其勢蹙之薰灼可知矣臣反覆思之方今四方羣盜甫息瘡痍未瘳邊塞多虞饑餉不繼浙東西諸郡自冬徂春雨雹為災糶麥不登待哺之民嗷嗷千里事勢若此苟不為陛下言之則已歛之財必入朱寧之手而民心傷矣心傷則本傷陛下其能晏然於上乎今人有一飯之恩必報陛下之待朱寧豈一飯比哉不圖報則已反取陛下之邦本而動搖之略不顧惜跡其所為在子為不孝在臣為不忠法所必誅而無赦伏願陛下割偏愛之私奮獨斷之勇廷詰朱寧以鬻欵害民之罪仍乞急勅都察院行巡按浙江御史會同鎮守三司將已歛欵價盡還給民未歛之數隨即停止并查奸吏影射多科之弊悉置諸法則民怨未甚猶可慰解邦本未搖猶可培植疏上通政司以示寧寧懼留疏不

下謀遣校尉捕假勢鬻鈔者以自飾於帝而請以鈔直還之民寧初欲散遍天下先行之浙江山東為巡撫趙瑄所格而浙以良永白登其奸自是不敢鬻鈔矣良永念母年老決意求去寧徑批不允且授以無憾意良永曰是欲牢籠我耳俄復拜疏得請致仕世宗登極誅寧起良永都察院御史撫治陽陽時母年八十良永再疏乞終養謂忠孝一道君親一體苟於風化少有裨助亦臣報答之萬一也御史姚鏜請加褒獎冢宰喬守謙依侍郎潘禮御史陳茂烈例優卹奏有司月給米三石久之母卒服闋起總理糧儲兼巡撫應天行抵浙疾作曰吾其休矣乞致仕未報遽歸無何卒命下擢南京刑部尚書良永不及見也訃聞賜祭葬謚簡肅良永侍父疾衣不解帶者三月母疾良永年六十餘矣手進湯藥無少懈居倚廬哀毀如孺子哭稱純孝馬素善王守仁而論學與之異嘗語人曰近世學者專言心學自謂超悟獨到推其說以自附於象山而上達於孔子目聖賢教人次第為小子無用之學

程朱而下無不受擯而不知其入於妄或外似矜持而中未必有殆羊質而
虎皮者乎弟良節子重杰見孝友傳孫攸績良節字介卿成化丙午經魁
與良永同登弘治庚戌進士歷禮部郎中出為惠州知府陞廣東參政左右
布政使以轉餉功受白金文綺之賜所至有惠政无弟同朝岳伯時人榮之
子重熙正德丙子鄉薦孫攸躋攸績良永孫嘉靖癸丑進士歷山東左布
政居官務持大體不為媵阿於簡肅殿祠遺文彈力經營可謂克承先德者
矣攸躋良節孫嘉靖庚戌進士令順德清慎愛民歲饑勸賑有法攬江盜
起計獲之人為立碑遷南京戶部主事以侍郎黃樵官事坐免歸闔戶著書
不與外事

林雲同字汝兩嘉靖丙戌會試第四人改庶吉士時同館相約不謁時宰俱出
補郎署雲同授戶部山西司主事戊子以京朝官主廣西試己推稅九江作
誓江文以自勵舟隨至通發夜分披衣起啟鑰毋令飄泊風濤中商人德焉

比及瓜歲計外羨金千餘緡撤府收之不持一錢行擢禮部祠祭司員外部
壬辰同考會試癸巳轉浙江提學僉事持憲甚嚴時相張璠為其壻請廩峻
拒之以艱歸服闋補河南僉事備兵潁上又明年庚子轉廣東提學副使功
令一如浙中會御史某欲以射圃為邑官園林雲同持不可必取射圃者請
先歸學篆御史語塞後歷浙江右布政使當入覲行李蕭然廷旌治行第一
尋轉左布政使浙有王金箔者坐罪贖相夏言為求晚竟論如律人危之未
幾夏言罷擢都察院右副都御史巡撫湖廣時辰沅師興督府檄取行糧數
十萬雲同曰楚比歲不登物力盡矣可竭澤而漁乎乃奏貸輸邊歲例粟十
五萬給之民得少甦頃之有屬縣李某以賄遷內臺與嚴嵩子昵雲同疏摘
其狀李異辨有旨各回籍聽勘已而按楚者直雲同褫李官然雲同以嵩柄
國無心仕進構湖上一區讀書其中暇則與諸生講解疑義有終焉之志隆
慶改元起刑部左侍郎不數月轉南京都察院右都御史掌院事至則刊立

會約去奢就儉南郡侈靡之風為之一變值大京察與冢宰秉公旌別去其
秦甚給事中石星等以言獲罪抗疏救之謂保全終始乃人君待士之道至
於當憤怒而薄責已譴逐而收復非仁聖之主弗能也明年轉南京工部尚
書以歲漕奏免江南十縣蘆洲課十之五又奏南京諸公署壞聽令自葺非
奏請不得擅費水衡錢其壹意節縮如此先是兩疏請老復典司馬劉采同
時引年並荷渥旨慰留章凡五上而後得允蓋隆慶庚午歲也萬歷三年復
召南京刑部尚書再辭不允強就道比抵京復辭如故始奉旨俞允謂力疾
趨命懇疏乞休得大臣進退禮俾乘傳以歸卒年七十有八贈太子少保謚
端簡雲同天性孝友律已方嚴嘗佩孟子人有不為而後可以有為之言終
身持守不失尺寸讀書中秘時題壁云寧餓死不為不廉之夫寧布衣不為
干進之士自林貞甫後僅一再覲而已子諧見選舉志孫璫廢官刑部主事
郭應聘字君賓嘉靖庚戌進士授戶部主事典芻積歲寧侯仇鸞部下橫索芻

商賄力裁之監通州倉米價涌貴令輸者紬繒及價捐則免糴充庾而歸羨
金於朝上下交利馬厯郎中出守南寧陞威遠兵備副使粵寇起從制府吳
桂芳討平之兩入計治行皆第一擢四川憲副備兵威茂兼攝松藩西人故
索賞驕甚諭以禍福為立賞格却無名之求成為感激謝去轉廣東參政時
流賊犯增城執辱前守發兵擊破之並破從化龍門二源諸寇擢廣西按察
使晉右布政使忠州桀酋黃賢相與思明前堂地計擒之轉左布政使隆慶
四年大破古田賊斬獲七千有奇拜金幣之賜擢右副都御史巡撫廣西奏
忠州去土設流得旨報可予州名曰新寧韋金彪者羅陽巨盜也數出剽江
上應聘計擒之府江上起陽朔下達昭平亘三百餘里諸徭夾江而居怙險
剽劫攻圍荔浦永安劫知州楊維執指揮胡潮事聞大學士張居正奏假使
宜行事寓書應聘曰美荒瘴癘驅役數萬象不宜淹留速破其巢則餘賊破
膽應聘集士兵六萬令總兵官李錫進討未行而懷遠徭亦殺知縣馬希武

反應聘與制府殷正茂議先征府江三閱月悉定乃檄錫討懷遠天大兩雪
無功而還應聘益調諸路兵鎮撫白果黃土大梅青淇狗種以孤賊勢錫與
諸將建破賊斬其魁懷遠遂平初議行師錫以陽朔金賢嶺賊近欲先下之
應聘曰君弟往吾自有處置錫行數日應聘與按察使吳一介出不意襲殺
其魁陽朔亦定乃分遣諸將討洛容上油邊山永福諸寇叛猖恣乎神宗大
悅進兵部右侍郎巡撫如故萬曆二年召為戶部右侍郎尋以憂歸久之十
寨諸猖復熾上念應聘熟粵等起再撫廣西諸猖聞之各鳥獸散因請三鎮
隸賓州以土巡檢守之而統於思思參村十寨遂安劉御史臺謫戍嶺西為
之慰勞周旋死則護其喪以歸繪像祀之雖以張居正耽耽弗計也三年晉
右都御史兼兵部侍郎總制兩粵軍務東山營卒亂聞應聘至爭自乞降慨
然歎曰人心獨幸亂哉持兵駿民咎實在上乃作旌廉杜魏功令頒誠將吏
無敢操一幣入韓門者悉汰冗役蠲津灣諸稅以利民粵人訢若更生踰年

召為南都察院左都御史兵部尚書參贊機務疏陳句軍四議上嘉納施行
已而病作四疏乞骸奉旨馳驛歸復上安民四議而後去抵家未一月卒年
六十有七應聘平生謙抑不伐踐踐若儒生至於握機制勝似有神授在廣
西奏復陳獻章王守仁祠官南京與海忠介敦儉素士夫不敢汰侈忠介謂
司馬入粵地增毛幾尺識者以為名言贈太子少保謚襄靖子良翰歷官黎
平知府見儒林傳

列傳十三

明

陳經邦

康大和

林堯俞

周如磐

曾楚卿

林茂達

陳經邦字公望言子嘉靖乙丑會試第二人改庶吉士授編修時神宗在東宮

選宮僚經邦為講讀官及登大寶日執經侍左右每進講明白懇切音吐洪
亮上時改容聽之賜齎甚渥嘗命詠御前筆墨硯劍立就詞四闋又應制諸
詩賦皆稱上旨御書責難陳善四大字賜之時上方冲齡向學優禮儒臣游

情筆札而經邦儀度莊雅進退雍容凡在經幃莫不屬目上嘗呼曰白面書生而不名轉諭德掌坊事進侍讀學士掌院事擢禮部侍郎加太子賓客轉吏部左侍郎改掌詹事府教習庶吉士掌偶一在告詔特免朝參遣中使齎上尊醪貯存問扈駕登天壽山賜麟衣銀勺匕筯環刀兩宮召見慰勞各有賜皆異數也未幾轉禮部尚書兼學士經邦自為史官至正卿皆直講未嘗輟既典春官所條奏皆有關典禮前此張居正為相操切庠序多所降黜督學諸臣承風以刻覈為能經邦疏言明經貢舉乃國家盛典學校人材所自出宜稍寬假以作興士類諸非令甲而創新例過為繩督者皆罷之一遵其舊上報可海內為之伸眉未幾壽宮役興輔臣與言路議異經邦奉命覆視不盡如輔臣指啖言路攻之遂再疏乞歸時尚未艾林居三十年每銓宰閣臣缺廷議輒推經邦上亦勞念時問先生無恙而柄國者尼之卒不得大用癸未分校禮闈如尚書羅萬化祭酒馮夢禎皆出其門子翰臣見文苑傳孫

鍾岱廕至戶部郎中曹鼎莘捨宅為寺道入縑流鍾銜廕戶部主事

康大和字原中嘉靖乙未進士選庶吉士授編修丁內艱歸服闋補任同考會

試預修會典己酉主試順天興閣官贊同事闕病錄文多出大和手遷右春

坊右諭德癸丑主會試武舉是年遷侍講學士視院篆時嚴嵩用事大和絕

跡權門筮仕幾二十年始進南京禮部侍郎會河洛寇發都御史李某請城

鳳陽及移高牆庶人于泗州上遣大和同南京工部侍郎林庭機往覈其事

僉謂中都乃帝業所基陵寢在焉建城事重不敢輕議惟移置高牆庶人當

如撫臣言已而泗民奏弗使事遂寢守南禮部八年不調作拙宦對以述志

辛酉遷南京工部尚書或因風聞有所指摘乃引咎乞骸不允癸亥再疏自

陳遂詔致仕時倭寇犯城士大夫多避亂他徙大和遂僑寓嘉禾四年始還

甫與林司寇雲同及同輩年七十以上者結社賦詩郡守呂一靜請借邑中

三四房續修輿化府志書成謂稿出眾手事間失實作修志媿言欲重加刪

訂未就而卒大和質實敦厚不事表暴少為林貞庸俊所重在館時壁書學
林二字或問之曰庭機吾所不及也其謙虛類此有礪峯集若干卷子一韓
應天甲子鄉試中式一俊以廢至黎平知府

林堯俞字咨伯煥章子萬曆己丑進士改庶吉士讀書中秘留心昭代典故入
直起居教習內書堂分校禮閣冊封益藩皆隨事庀職恪恭周慎在史館十
年始量移宮坊贊善隨請假省親歸建丁內艱堅卧不起以少宰楊止菴薦
補原官轉左諭德兼侍講升南京國子監祭酒時詞林有亟謀爰立者增弋
諸前輩無一得免堯俞連疏乞歸杜門十載無片字入長安益肆力經世之
學纂修郡志倡新文廟皆里居之要者熹宗改元詔特起以禮部右侍郎視
祭酒事固辭不允途次自陳再蒙溫旨旋以左侍郎還部擢尚書凡郊天幸
學殿工陵寢冊號選婚實錄貢舉諸大典皆準古酌今次第筆舉最稱明備
光宗實錄成擬進御製敎文有金滕無圭璧之祈靈藥寡瞑眩之效等語頗

侵權貴奉旨選閣增顯逾制上疏力争至再稱述祖制有願垂復霜之戒毋
啟旁落之端便給惟供手使令繼述允成于大孝等語辭極懇切忤逆璫魏
忠賢先是忠賢亦知敬慕堯俞嘗治第求堯俞書扁堯俞弗應忠賢遂請旨
命書堯俞不得已承旨書之顏曰畏天堂忠賢不樂及見是疏乃向人恚云
宋伯豈無意綸靡一席地耶何遽張拳相向堯俞笑謝曰予知祖制不計其
他及奉命會同選閣忠賢援故事欲據中座堯俞豫戒胥吏席移置兩柱間
而虛其中設篆案忠賢愠謂欽遣吾儕例應中座部院居次奈何廢自今日
手堯俞正色云公等原由本部選進安可一旦輒相躋躐忠賢氣沮竟均席
罷去選侍李氏擬封號又引典章謂宜少緩俟皇八妹選婚日另議未晚為
用事者側目朝鮮國李輝幽廢其主倬而自立島帥毛文龍為請封號議欲
從文龍請藉輝以牽制東急堯俞力持不可移檄屬國勒結示以詰責大義
迨取其成案然後已懷冲太子之誕也忠賢與客氏謀詭秘幾危母后堯俞

向一二中涓晚以古今順逆報應中宮遂安督造慶陵相度獨勤周行霜雪中不憚勞勩駕幸太學扈蹕如雲園橋填塞一時導從大僚皆蹢躅失次堯俞進退趨蹌不失常度郊天導駕肅宗玉步甚迅回顧堯俞為中璫軹不得前竚立以俟且戒璫讓路嘗恭進大祝冊由中御路直抵皇極門上親起受閱注視良久目送殿階光宗寶錄成加太子少保慶陵工成叙錄加太子少保堯俞見黨禍已成堅意乞骸蒙旨慰留情辭益懇始予告出都先幾遠引而時事益不可問矣當故卜列名之際官府比結引用私人南樂魏廣微與忠賢謀合擠堯俞堯俞恬不為意抵里門與故人觴詠築南谿草堂所著谿堂詩集四卷文集二卷卒年六十有九計聞贈少保廕子入監謚文簡賜祭九壇子銘鼎庚戌會試第三人官至湖廣左布政遷廣西蒼梧參政擢南京光祿寺少卿初授高郵知州時堯俞誠之詩云始終慎一節佩服比韋絃以故治州精明清慎州人至今畏壘祝之

周如磐字聖培少不好美舉止異於常見萬曆戊戌進士改庶吉士授簡討丁未分校禮闈首拔丁紹越後與如磐同登揆席當時榮之壬子典試江西陞右諭德乙卯典應天試轉右庶子管司經局事冊封淮藩竣陞南京國子監祭酒如磐病請寬限神宗以陪京首善地非如磐方正不可再教促之赴監嚴以訓士正以釐文得師表道晉少詹事兼侍讀學士熹宗改元陞禮部右侍郎纂修玉牒充經筵日講官神宗先宗實錄總裁厯太子賓客吏部右侍郎掌部事乙丑陞禮部尚書攝郊祀秩進東閣大學士時黔筑印笮之間盜起勢甚熾朝議欲召數省兵捐餉百萬勅之如磐以為不可從容定計密諭武臣授以方畧誅魁赦從不數月而平晉太子太保文淵閣大學士如磐惘幅坦夷一本至誠以局事日憂憂忡成疾四疏乞歸得旨予告未出都門而逝年六十贈少保謚文懿初如磐在祠林值神宗在位久前星未曜如磐歎曰國家之事孰有大於此者上書首輔王錫爵以力請建儲為第一義及三

王并封命下如磐再疏諫神宗溫旨優答光宗在東宮覽如磐疏有忠直可
嘉之獲入直僅四十餘日論者惜之子霖以廢授中書舍人露見忠義傳
曾楚卿字元贊萬曆癸丑進士改庶吉士除簡討時昇平日久詞林以觴詠為
娛楚卿獨下惟精討掌院何宗彥器之萬曆己未同考禮闈得士皆知名尚
書顧錫疇為尤著嘗移書樞部勸及時選將練兵因著有營屯壁壘諸書天
啟初轉春坊贊善歷詹事府詹事兼學林院學士侍經筵嘗言人主涵養德
性宜接賢大夫之時多親宦官宮妾之時少熹宗嘉納之三錫銀幣少宰張
鳳欲糾魏忠賢疏陳八事曰虔步禱曰蠲加派曰停內造曰尚政務曰寬言
路曰懲貪墨曰飭邊事曰慎宮闈疏上翌日鳳遂罷歸時楚卿方轉南京禮
部侍郎忠賢以楚卿出鳳門同謗朝政亦削奪歸崇禎改元起禮部右侍郎
陛見陳說天法祖姓民困寬刑獄豫邊防五事轉吏部左侍郎進禮部尚書
時溫體仁當國楚卿與柵繫乞休上猶不允體仁奏楚卿實病予告回籍卒

年五十八著有棠坡集十二卷曾城集六卷銓署日錄二卷子世哀見忠義傳

林茂達字孚可父思承景泰五年進士選為御史辭弗就除知冀州奏蠲蕪田二千頃歲賦築堤堰以禦漳河之水患秩滿九載遷淮安府同知致仕卒茂達宏治壬戌進士授行人拜監察御史出按畿甸所部肅然擢湖廣按察副使貴州左參政往鎮西鄙西人以寧會諸夷抄畧烏撒邊城堡茂達戍官屬為之備夷撼溪以渴城內茂達因上流鑿石為涵地中行二里許入城人乃利汲號林公井夷大驚引去擢雲南按察使以繼母憂歸服闋補四川尋擢左右布政使邊糧率十數鍾致一石輸者恒至蕩產茂達計儲遠近費多寡融徵分解而督以官民用弗困解京歲需例有火耗舊為州縣乾沒解者逮繫至死則出餘金以代按宿弊而嚴示之其庇民類此丙戌再疏引年陞都察院右副都御史致仕己丑復起南京大理寺卿懇辭允之丙申年踰八十

明堂禮成有司奉奏備禮存問給與夫月米海內僅有也茂達廉白儉約在蜀歲久惟以二僕自隨家居十五年甘貧自守吟詠為樂與兄茂春同居老而稱篤施恩於人未嘗令人知年八十六卒

列傳十四

明 林 富 王大用 俞維屏 劉 勳 陳 志 翁夢鯉 柯 景

潘應龍 林汝永 子廷陞 唐際盛

林富字守仁弘治壬戌進士授大理寺評事忤劉瑾下詔獄在獄中與王守仁講易旋謫潮陽丞復以大理事文致罷官仍罰米百石謹誅起袁州府同知陞寧波府知府當道議增募鄉兵令編戶輸直富以歲儉民貧持不可市舶閩奴橫奪民緣捕置之法廣德湖自宋為官田輸租特重既而租調並征民大不堪乞如花嶼湖全折例富憫而全之民樹祠白鶴山以志去思丁外艱服闋補處州府知府孝豐寇湯毛九倡亂承委征勦富親搗賊巢擒其魁並

黨數百嘉靖改元陞廣西參政廣西糧儲素乏疏請廣東折銀五萬兩益之
嘉靖二年入覲以治行卓異陞廣東右布政先是魏督學毀寺籍其田巨室
爭利之富定議以田充軍餉給學膳以其地為書院社學醫學有差修築南
海衛城設大埔縣治尋調廣西右布政兩廣都御史姚鏐委以思田兵事蓋
岑猛麾下盧蘇輩結思思遺孽王受為亂受在思思執知府以下官屬羈縻
他所領衆出掠將逼武緣富決策部分諸將先趨思思為內應賊挫乃聽撫
會鏐解任代者王守仁復相委重遂下令撤兵蘇受率衆七萬降朝議欲改
土歸流富謂思州宜流田州土官不可廢但稍貶降分其權庶上不失朝廷
大體下不失夷人心遂行其議富久居邕管知八寨猛賊與思田勢相倚請
於總督宣以時定師既出而富陞四川左布政又進都察院右都御史撫治
鄖陽毅然請終其事冒兩提兵入險擒斬無算奏凱而後行八年守仁疾篤
薦富自代陞兵部右侍郎兼右僉都御史代總督之任中貴採珠合浦督責

甚急富疏言其非罷之嶺東賊王基僭號海寇黃秀山叛以次討平之廣州會寧寇流毒州縣富奏陳事宜分兵擒斬四千有奇未十旬克塞七十四降寨如之特奏褒獎金幣甚渥復上六事為會寧善後計皆報可會寧民祠祀焉粵中公私諸費多資商稅市舶不至則公私交困富謂與法蘭互市有四利貢物足供御用一也充餉備不虞二也上下交濟三也小民可資衣食四也助國裕臣兩有所賴因民之所利而利之非開利孔為民種禍也故事撫臣不二年輒議大征富謂多殺非安邊之策奏請非甚棘毋輕用兵與御史異議累疏乞休時方獻夫家怙勢奪民產富屬僉事龔大稔裁以法乞休疏入獻夫取旨回籍聽勘會海寇許折桂為梗輒檄巡海副使某出兵及敗反以失事為富罪獻夫從中應之遂削職大稔隨被逮以死富歸構小亭於東山戶外事不以經慮卒年六十有六有奏議二卷子萬潮孫兆珂兆恩自有傳餘見選舉志

王大用字時行其先揚之真州人明初以籍隸興化衛始為莆田人正德戊辰
進士授工部都水司主事量漕臨清巨寇劉六等嘯聚張甚大用選勁兵出
郭西津賊數戰不利引去擢廣東僉事備兵清遠會樂昌高快馬偽稱天王
流級湖南彬永等州詔合兵討之大用帥所部將士深入疾戰斬首級一千
四百有奇加俸一級又清遠猺熾復率所部渡浥江旗坑諸塞得賊帥梁永
寬一人斬首千有餘級又移池水攻黃藤峽黃華洞諸巢得賊帥廖鎮江偽
都督楊旺二人斬首二千有餘級復加俸一級陔本司副使兵備如故嘉靖
初以征黎蠻表獠功最賜金綺累陞廣西左布政入為順天府尹尋擢都察
院右副都御史巡撫順天兵部以大用習塞上事疏改巡撫大同大用至破
巨盜劉善果追斬之因條上三邊機宜數事未幾為給事中秦鰲所論改巡
撫順天後推掌院名上而御史張祿先按大同與大用爭禮不相下鰲論祿
所嫉也既綰院命下祿私念前過乃撫虛事詆之會朵顏三衛誘北兵十餘

詐稱入貢詔大用督參將周璿蕭陸詣闕閱實還報大用乃單騎入城調兵扼險令二將伏所部為左右翼逢擄之敵謀滅宵遁復諭其酋長幹維者令獻黑谷關地至太平塞五百餘里計議已定與飲盟去張御史復論大用生事構怨坐免久之起巡撫四川時獲白兔不表聞而地震水旱請修省蠲租不置天子方齋祀太乙羣臣爭上符瑞見大用疏心殊厭之已而擢南京刑部右侍郎會白草蕃帥衆攻平蕃堡給事中扈永通罪以失事基禍遂坐還籍候勅卒于真州遺命葬黃子邦圻疏請卹典太宰李然嘗遺書趣之至則然為趙文華誣奏繫獄時分宜相嚴嵩子世蕃竊威禍諸以恩澤請者非入千金屏不奏邦圻橐無一錢從里中士大夫乞貸得百金餽之世蕃訝曰爾父苦節安得有贏金乎麾不納已而忽如所請後知為嵩在西直嘗召其子語之曰王時行一世偉人數著戰功家甚窶爾毋以恒調困其兒也邦圻孫家相以廕為潮州通判

俞維屏字樹德祖應辰字仲尊正德甲戌進士授繁昌知縣多惠政祀名宦召職方主事歷員外郎轉廉州石阡知府兩任黃堂蕭然四壁維屏年十九領嘉靖甲午鄉薦戊戌成進士授刑部主事時嚴嵩當國託人道意欲羅致附己維屏絕不與通有所囑堅持不可立剖其寃忤意謫官嵩敗起補主事遷員外郎轉嘉湖僉事河南參議築長堤障河民永賴之宗室侵奪民田民無控訴維屏歎曰窮通有命吾豈可惜一官畏其側目而使民隱不上聞乎即具白兩臺力陳其事遂奏請還民遷廣東憲副值洞寇反臨州郡維屏會師合勦絕其糧道斬首九百餘級賊大困願撫維屏開誠單騎按其營壘賊悅服解散峒寇遂平詔賜金帛內侍王守忠捕翡翠海濱大肆民害維屏一繩以法忠怒誣奏落職父老攀哭祀名宦後事白遷貴州左參政丁內艱服闋陞貴州左布政赴任卒于長沙

劉勳字紹功正德甲戌進士授刑部主事改吏部初嘗伏闕抗疏與議大禮以

許旨廷杖已而歷員外郎晉考功郎中裁品人倫具有識鑒一日冢宰視堂
事而考功署咎人聲達堂署安仁桂萼惡考功傲又與粵東方獻夫以譙集
有他言因調為南京禮部郎中久之丁母艱歸道拜山東參議累遷四川參
政時巨寇李和尚輩據險為亂數歲不能平勲至傳檄定之擢右副都御史
巡撫寧夏猶以考功前過不容於執政引疾歸岩居二十年卒

陳志字思尚嘉靖癸丑進士授行人擢監察御史按南畿以北四郡時倭寇內
陷武備久疏志以鳳陽為祖宗陵寢所在而淮陽則漕輻都會乃督師走泗
上通賊壘而陳境內以寧疏發帑金萬餘兩市粟麥數萬石以賑淮陽饑民
己按江右陞大理寺丞晉少卿無何拜僉都御史巡撫勦陽與南贛撫臣有
隙遂中蜚語罷歸志自釋褐至開府僅及一紀家居三十餘年卒

翁夢理字希登嘉靖庚戌進士授金華知縣擢戶部主事推游暨闕時倭寇蹂
躪吳會商旅往來益稀請蠲歲額不從時論躋之事竣轉餉之邊以過家踰

限謫倅潮州潮方受倭禍而守適缺夢鯉至則攝其事蛇浦南灣三河之戰皆身先士卒前後斬馘七百有奇蹈水死者以千計倭旋遁而廣寇張璉等乘間竊發執縣令欲甘心馬夢鯉指授方畧或擒或散竟昇令以歸移守開州比行復解程鄉之圍而去入開未幾惠潮之倭踵至乃移夢鯉丞惠州又攝潮州與總兵俞大猷會勦于可塘與參將湯克寬王詔夾擊于九龍山擒斬無算會與寧柘林間嘯聚甚衆吳平林乾兩巨盜出沒海島中勢仍棘手南贛撫臣疏請自嶺以東特設海防僉事以夢鯉任之於是平河源服五峒大星港擔竿州所在奏捷威名大震而夢鯉以軍旅勞瘁卒于官粵人惜焉所著有謫居稿戶部稿拙庵管見

柯朶字季和茂竹子萬曆甲辰進士授鄞縣知縣邑多要紳號稱難治朶綜核精敏物無遁情奉母饒饒外淡約自供而已遷南京戶部主事勾稽出納及時散給人不苦守候吏亦不得緣以為奸權揚州鈔關疏除商羨故事回空

糧船例有納餉始得過潁悉蠲之補河南知府即為畿輔衝煩地潁不携家
乘單車抵任汝政安靜不擾周詳得情治行稱三輔第一舉卓異陞易州道
副使擢尚寶司卿轉太僕寺少卿改右通政司通政秩滿三載晉右僉都御
史巡撫山西三晉雄邊任不輕授潁開府二年百度改觀邊備整練以母年
紀高邁疏請歸養母歿哀悲戀不已卒于苦次人痛悼之

潘應龍字元辰萬曆丁未進士知揭陽邊麗水縣皆有惠政以卓異擢南京刑
部主事轉郎中多所平反出知池州德著於民擢廣東右江道兵備賓州地
近土司磽瘠瘴癘人不樂就應龍善撫循漢夷為尸祝於家龍山賊胡扶記
叛破潯州時左江道缺巡撫以賓密通龍山為賊歸竄路檄應龍督兵往截
應龍時報遷川東參政日以母老思歸且非所轄地巡撫稔其素有宏畧得
土舍土兵心固留之應龍遂以討賊自任日與督兵諸將領度陵谷險要情
形靡有寧晷冒犯霜露不敢言勞未幾得瘴病遂不起臨歿不言及私但問

賊首除否賓得之人無不悲涕督撫交章以聞上嘉其志慮忠勤死於王事特贈太僕寺卿予祭葬廕一子入監令有司建祠祀之

林汝永字君修洪元孫嘉靖壬午鄉薦授南樂教諭戊子典試浙江得相國呂本等若干人以學行擢國子博士侍經筵賜品服改南京戶部主事歷郎中

惟稅淮關清介自持稅銀日發山陽貯庫按季累解漕運御史周金每稱程比部考民敏決林板閘汝永有守陳都水免博學為三君子出為思思知府

值猖獗盧順蘇閩等構叛汝永設計擒之夷民孽服總制張經御史陳宗慶上其事賜帑金三十兩丁內艱服闋補黎平陞長蘆運使奏減拖貧鹽課十

餘萬灶民德焉致政歸與諸大老結八老會賦詩杜門屏迹年八十卒以子廷陞貴進階嘉議大夫 廷陞字彥賓萬曆庚辰進士授行人陞戶部主事

督餉小灘親歷水次以驗糧儲宿蠹為之一清歷員外郎中出知雷州府雷僻在海外民貧盜數甫下車即擒巨寇鄭紹隆等數十人賊黨解散颯風壞

海岸田禾淹沒延陞請帑金五千兩築長堤二千丈既田萬餘頃雷人塑像
祀之陞廣西副使備兵昭江適岑溪獠亂督撫檄攝蒼梧至則調度兵食畫
策督戰斬獲千餘級捷聞賜白金文綺晉三品俸未幾昭江獠復叛廷陞冒
暑視師勞瘁積病因解組歸卒年七十七孫琮曾孫眉自有傳

唐際盛原名玉字士瑩萬曆丁未進士授祁門知縣欵獄積案片言立剖刷風
弊草火耗禁豪族射利病民調嘉定祁門人聞城留之拒嘉定來迎者曰毋
辱吾天因不果往遷戶部主事督昌平糧儲却例金八千兩奏還內府出知
嘉定府釐弊剔奸如在祁時以失吏垣意歸旋起復知杭州杭多豪猾聞際
盛威名肅然成就繩束他郡邑有盆窵者爭求直於際盛日剖數十案無一
迫情織造錢糧萬計令諸商面免給發耗羨盡蠲陞本省副使加參政督餉
入京賜宴晉按察使歷左右布政使際盛官浙西久冰心鐵面屏絕交際尋
擢都御史提督操江甫抵任歎武備廢弛因大治戰艦廣募水兵猾吏竄瑞

繡袍鉤萬三千兩奏請追給戰士奸徒李福程心泰奧援某尚書及假惠王金牌事恣置之法朝廷紀其名于屏粵寇蹂躪江右召赴援舳艫蔽江而下賊聞風解散疊書褒獎有實心任事素著廉幹之稱丁外艱聞訃徒跣歸哀毀病卒年五十九

列傳十五

明

黃

鞏黃體行

鄭

岳王

鏞

李廷梧

林大輅

鄒守愚

陳

仁

黃待顯

郭日休

王鳳靈

黃鞏字伯固宏治十八年進士正德中授德安推官陞刑部主事選員外郎改兵部郎中丁內艱歸服除會武宗北巡人心危疑或沮鞏行鞏題書屋曰茅屋石田為生太拙鴟夷馬革自許何愚竟北上補武選司十四年春上將南巡時宸濠久蓄逆謀蕭敬張銳在司禮錦衣東廠與濠交通江彬又握勁兵在上左右公卿交疏不聽兵部司屬倡諸司上疏諫鞏曰上巡遊本起江彬

誘惑彬方寵倖擅兵無敢斥言者吾不可舍彬為支語恐上不悟乃獨疏六
事曰陛下親御以來祖宗之綱紀法度一壞於逆瑾再壞於佞倖又壞於邊
帥蓋蕩然無餘矣天下知有權臣不知有陛下竊忤陛下而不敢忤權臣陛
下不知也亂本已生禍變將起竊恐陛下知之已晚矣試舉六事於今為最
急者其一曰崇正學人心之善其體甚微而利欲之攻不勝其衆是以靜常
吉而動常凶惟聖人為能主靜惟君子為能慎動陛下聰明天縱有古帝王
之資其所以盤遊無度者毋乃動之過乎臣願陛下高拱九重凝神定慮闕
異端遠佞人招延故老諮訪忠良則可以涵養氣質薰陶德性而聖學維新
聖政日舉矣其二曰通言路言路者國家之命脈也言路之通塞國家之治
亂係焉切見近時臣僚奏牘間或言及時政往往匿不以聞其或事關權臣
則又留中不發而中傷以他事使其不以言獲罪而以他事獲罪雖有安民
長策謀國至計無由自達雖有必亂之事不執之臣無由而知之矣臣願陛

下廣開言路勿罪其出位勿責其沽名以作士氣則忠言日進聰明日廣亂臣賊子亦有所畏而不敢肆矣其三曰正名號孔子名名不正則言不順言不順則事不成陛下無故降稱威武大將軍太師鎮國公遠近傳聞莫不驚疑夫陛下自稱為公則誰為天子者天下不稱天子事陛下而以公事陛下天下皆公之臣而非天子之臣矣今不削去諸名號昭上下之分則體統不正朝廷不尊古之天子亦有號稱獨夫求為匹夫而不可得者竊為陛下懼焉其四曰戒遊幸陛下始時遊戲不出大廷馳逐止於南內論者猶以為不可既而幸宣府幸大同幸太原幸陝西榆林所費財勳象使民間一夫一婦不能相保近復有南巡之命南方之民爭先挈妻子避去流離奔踣怨譟煩興今江淮大饑父子兄弟相食天時人事知此陛下又重感之幾何不流為盜賊也奸雄窺伺待時而發變生在內則欲歸無路變生在外則望救無及彼親昵群小皆欲陛下遠出而後得以擅權自恣乘機為利豈有一毫愛

陛下哉陛下宜翻然悔悟下哀痛罪己之詔罷南巡撤宣府離宮示不復出發內帑以振江淮散邊軍以歸卒伍斥不御之女各還其家雪既往之謬舉收既失之人心如是則尚可為也其五曰去小人自古小人用事未有不亡其國不喪其身者也謹按今之小人簸弄威權貪圖富貴實繁有徒至於首開邊事以兵為戲使陛下勞天下之力竭四海之財傷百姓之心至今紛紛未已則江彬為之也彬本行伍庸流兇狠傲誕無人臣禮但見其有可誅之罪不見其有可賞之功乃賜國姓封伯爵託以腹心付以提督京營之寄此養亂之道也彬外挾邊卒內擁兵權騎虎之勢不亂不止天下之人切齒怒罵皆欲食彬之肉陛下何惜一彬以謝天下哉伏望陛下大奮乾綱將彬明正典刑以為奸邪之戒臣等知言出而身危然使臣等不言則陛下不知而陛下危臣等危而陛下安臣等何惜一身報陛下哉其六曰建儲貳嘗聞漢人有言曰太子天下本也本一搖則天下震動陛下春秋漸高前星未曜祖

宗社稷之託，慈手無所寄。方且遠事遊觀，屢犯不測之區。此必危之道也。陛下徒知收養義子，布滿左右，獨不能預建親賢以承大業，倒置甚矣。伏望陛下上告宗廟，請命太后，旁諮大臣，擇宗室親賢者一人養於宮中，以繫天下之望。他日誕生皇子，仍俾出就外藩，實宗祿無疆之福也。臣等芹曝愚忠，媿蟻微命，死生進退不足顧。惜誠不忍陛下自取覆亡為天下後世笑。此所以痛哭流涕不知所裁也。車駕員外郎陸震見筆疏即碎已疏草，願同署名。疏入，彬大恨，欲並殺之。下二人詔獄，鉗校跪午門，眾謂天子且出，筆曰：「天子出吾當牽裾死之。」五日期滿，仍繫獄。越二十餘日，廷杖五十斤，為民彬使人沿途刺，輩有治洪主事知而匿之。間行脫歸杜門，著述家貧。或日中未舉火，晏如也。嘗嘆曰：「人生至公，卿富貴極矣，然不過三四年，惟立身行道千載不朽，世人顧往往以此易彼，何也？」嘉靖改元，召為南京大理寺丞，疏請稽古訓，崇正學，敬天勤民，取則堯舜，保全君子，辨別人小。明年入賀卒於京師，行

人張岳訟其直節贈大理寺少卿賜祭葬天啟初進諡忠裕同時直諫獲禍者有黃體行黃體行字于道宏治壬戌進士授工部主事改戶部嘗贖銀數萬兩犒邊積贏數百歸之公帑轉員外郎督儲通州申羊冗濫歲省糧幾千石正德甲戌乾清宮災體行上應詔陳言以答天譴疏于時番僧義子邊軍盡惑兒戲征斂有皇店內市打球錢之說童監誘聖駕潛遊外市移時乃入朝儀廢而不修宮寢疏而不行皆指陳無諱武宗怒削職為民家居貧乏授徒自給嘉靖改元委按群奸罪如體行疏召還擢處州府知府黜淫祠禁奸偽公暇集諸生講說而考校之甫七月疾作致仕歸體行性至孝居喪毀瘠老猶嗜學經生問業酬對靡倦年七十五卒

鄭岳字汝華露裔七歲而孤賴母林氏食貧撫教之宏治癸丑第進士授戶部主事改刑部主事論囚東市錦衣千戶張福恃勢越坐董天錫上岳奏論其非禮且言糾劾非鎮監職而董讓行之太常本禮部屬而崔志端專之內外

效尤益無忌憚忤旨繫獄尚書周經侍郎許進等論救贖故還職尋進員外郎許進督師大同貴近惡其剛方議代之罷職總兵趙景謀起用岳疏言進不可代景不可用京軍不可出朝論憲之轉員外郎遷湖廣按察僉事宗藩侵民田累奏不決岳竟歸之民施州夷民相讎殺有司以叛告岳擒治其魁餘悉縱遣荆畿岳勸富民出粟弛河泊禁屬縣輸糧遠衛率二石致一石岳以其直給衛而留粟備賑民乃獲濟常德守刑貨贖濫捕其左右置之法守解印去南臺會薦天下方面官十七人岳與馬正德初擢廣西兵備副使土官岑猛當徙福建據田州不肯徙岳許為奏改近地猛乃請自劾征黑松洞以捷聞調廣東兵備尋擢江西按察使遷左右布政使宸濠奪民田億萬以民設寨聚守濠諷總制勦以兵岳力阻之提學副使李夢陽巡按御史江萬實相勅詔下藩臬會勘岳欲平理夢陽務求勝濠嗾夢陽執岳憲司舊役誣岳用公堂銀岳子弘受賄送濠禁錮欲以脅岳事聞下鎮巡劾報巡撫任漢

顧慮不能決帝遣大理寺卿燕忠給事中黎爽按問忠等奏劾岳子私有迹而夢陽挾制按俱宜斥岳遂削職為民後濠伏誅中外交薦起四川布政使以憂不赴世宗初擢右副都御史巡撫江西民爭擁道聚觀額手相慶岳奏賑恤受兵郡縣定討逆功贈死事之臣皆報可甫三月召為大理寺卿輔正以擁立功議封伯岳貽書內閣蔣冕勸其辭避林俊以大司寇召至臨哀守法一無所假上言內臣有犯宜聽部院問理毋從中決帝不能從帝數不豫岳請遵聖祖寡慾勤治之訓宮寢有制進御以時退朝即御文華殿裁決章奏日暮還宮以養壽命之源報聞按甘肅亂卒總兵官李隆等皆伏罪還朝以災異陟刑獄失平八事尋遷兵部右侍郎時大禮未定岳言若以兩考養嫌第稱孝宗廟號毋稱伯考以稍存正統大學士石瑤請從之帝切責瑤奪岳俸兩月轉左侍郎請罷山海關稅不許中官崔文欲用其兄子為副將岳持不可尋夏總兵官仲勳行賄京師御史聶豹以風聞論岳岳自白因力

請致仕歸居家十五年卒年七十二岳事母甚孝念兄嶠鞠哀恩罄官俸以報至於開渠造橋修祠有利於鄉族者概不惜費著有山齋淨稿吟稿奏議駁稿莆陽文獻莆陽志略等書子泓舉生流初為濠所陷謫戍赦回廕授詹事府錄事疏歸終養王鏐岳同學友也弘治辛酉鄉薦授南昌學教諭逆濠誣岳指有橐金寄鏐處鏐携掠幾死終不肯以一語汙岳節因與岳同歸濠誅岳復起薦鏐不報鏐與林俊世居同巷俊以岳事益重之李廷梧字仲陽深經術弘治己未進士授桐鄉知縣吏治精敏仁愛尤加意農桑以最擢監察御史出按蘇松歷大理寺丞考滿罷歸廷梧歷官多年案牘之暇即肆力於文章既閒居籃輿烏榜徜徉山水間與諸老結社賦詩皆享大年者大司馬鄭岳尤重之

林大輅字以來正德甲戌進士授工部主事轉員外郎武宗降旨南巡兵部郎中黃鞏等疏諫下鞏等疏首六人詔獄餘同跪伏闕下待罪大輅偕同官請

山卿何遵上疏論救謂願與諸臣同効死並下詔獄有旨廷杖謫外繼而鄰舍衛尉因隙誣奏大輅怨望夫人黃氏詛咒復被繫並及五閏月事白釋出為夷陵州判凡謫官者率自矜不親簿領大輅曰一日食祿當一日盡職吾敢暇逸為於是踏隱田以甦平民賠賦徭役輕重罔或不均建書院以禮諸生公餘夜講一時文風自歐陽修後為之不振嘉靖改元徵入擢江西按察副使攝南贛兵備錄平寇功賚金幣陞河南按察使擢右布政使遷湖廣左布政使陞本省巡撫歲餘屬水災荒歉民多流徙加之藩封工役諸司告匱大輅停工蠲賦以贍流移引咎自劾言觸時忌罷歸家居二十七年以讀書養親為娛然聞時事可駭愕輒撫膺發憤孤忠大節老而彌篤厚於宗族親戚有享必極力扶之卒年七十有四嘗有愧瘡集當黃夫人之被逮也男敦復才四歲夫人徒跣抱託所親謂之曰此吾夫一塊肉善視之赴大廷對鞫銅投鐵箠備極慘酷至斷指不肯招鞫者諷曰速招可無受楚黃忠曰妾朝

夕艾香祝天子母他念惟冀皇與勿出以蹈不測之危耳妾夫為諫臣妾敢
妄招詛咒君父以貽諫臣羞獄中與穴輅訣曰妾孕身不任刑自分必死爾
妾思未報雙白在堂幼兒莫知存亡亦自勉力萬勿以妾為念未幾產一男
於獄中隨不育都人聞而壯之後衛尉攻罪去獄乃緩夫婦俱出觀者環堵
拱手稱為鐵夫人云夫人永豐里石庭村人子敦復以廢歷都勻知府
鄒守愚字君哲嘉靖丙戌進士授戶部主事歷員外郎郎中議行平糶法奏發
帑金賑全陝餓劫諸中貴冒芻艾與為逋逃主者持論諤諤不可司農倚重
馮出守廣州廣會郡也訟劇政勞多宿蠹守愚一處以至誠嘗辨誣獄釋累
歲不決囚數百人有庖人烹雞雜以茹養色墨御史謂其毒已坐重辟守愚
獨疑之令人如所具烹馮亦黑乃力爭御史前曰職誠不忍見一無辜伏地
死御史悟竟釋之政聲大振值歲饑設策賑濟民賴以甦新會民激於徵逋
聚海艘為變監司招之不應曰必鄒使君來也守愚單騎往民望見輒流涕

解散蒞郡四年置珍異不問廣厲學宮弟子多所成就安南用兵遷廣東憲
副督兵由潯賁入廉州聞父訃奔歸服闋起江西憲副攝學政所拔多名士
轉湖廣布政司參政苗民懾服常德饑便宜發長沙備兵米賑之調山東擢
河南左布政使時師尚詔犯歸德諸州郡率兵討平之汴河溢歲且旱盜起
梁宋間詔以守愚巡撫其地綏御有方境宇敎寧晉戶部左右侍郎乙卯晉
秦豫皆地震命大臣往秩祀河嶽百神行賑卹守愚以才望當往由山西入
陝川馳驅七十日祭告殆遍賑給數萬衆掩骼埋黃俱一時勅辦以積勞卒
贈右都御史謚襄惠賜祭葬守愚居家孝友與人交肝膽相照歎歷中外卓
著廉聲獨就書如錢溫著有俟如堂某更疑易釋義奏疏詩稿若干卷子通
鑑授通判迪見選舉志

陳仁字子居少通經術以博洽稱成化癸卯鄉試第一丁未成進士授戶部主
事歷郎中在部久明習條例大司農韓文尤倚任之屬陝西邊餉急因奏調

仁為陝西司郎中未幾劉瑾擅政深忌文因摘其屬官細過仁坐降岳州同知轉汝州知州遷南京兵部員外郎掌武學事瑾誅擢浙江提學副使按試縣以胥吏從諸生文藝手自披閱去取惟公士論大服轉參政以疾乞休仁久歷中外學行有聞詔進浙江布政司布政使致仕命未下仁已先卒仁賢重沉敏議論嚴正嘗疏止給事中林廷玉外竊追復御史彭程官言多剴切晚年造詣益深文章奧美有機軸時譽歸之

被待顯字君俊正德丁丑進士授戶部主事監清河庠痛釐弊蠹轉員外郎中世宗更定章聖皇太后尊號待顯同何孟春豐熙等伏闕言尊崇之典明詔已定今忽去本生二字是重所生而忘所繼徒知私親為孝而不知紹大統為大孝也奏入留中後同何孟春等跪哭左順門聲徹大內上怒命收繫諸為首者豐熙余寬張紳余鞠陶滋相世芳母德純及待顯八人于獄拷掠編伍於是待顯謫戍廣東碣石衛者十三年丙申九廟告成蒙恩釋歸年餘卒

隆慶改元贈太常寺少卿

郭日休字德夫正德辛巳進士授戶部主事慷慨有大志世宗議興獻大禮日休疏持濮議爭甚力詔下錦衣獄杖三十削職歸久之始復官遷郎中以京朝官典試湖廣旋補該省參議秩滿晉浙江參政調雲南陞貴州按察使以事典按使相持即日投劾歸板輿奉母母年百歲終日休亦八十矣猶作孺子哭甚哀人以為孝所著有九華全集若干卷

王鳳靈字應時伯父玉榮成化壬辰進士擢御史方正有聲鳳靈生負異質日誦書數萬言為文章以氣勝正德丁丑進士授刑部主事明習法理宦官張銳都督錢安等罪當死詔減戍且許贖金鳳靈具疏曰此等非逆瑾牙爪則錢寧羽翼非交通宸濠則結好江彬必謀之賊也今以賄囑轉移聖慮臣恐奸雄伺釁皆將謂私交可無誅亂政可不殺而獄可賂鬻肆無忌憚天下之毒可勝言哉給事陳洸罪有顯狀世宗以議禮故庇之鳳靈疏言議禮者自

議禮犯罪者自犯罪何得援此以掩彼時論題馬出為襄陽知府未幾以母
喪歸服闋補淮安府龍溪書院引泮水入泮以開科第之祥又因歲頗旱
蝗疏請蠲秋糧雜賦出餘鹽銀數千以賑民民賴以甦升廣西參政歸鳳靈
性伉直好談論天下事其文章名高一時所著有淮陽急稿

列傳十六

明 吳大田

黃懋官 叔布部

鄭大同 弟綱

邱秉文 黃

謙

程拱宸

林道楠

吳大田字紹曾宏治甲子鄉薦授扶溝教諭尋遷興府伴讀時世宗方在幼冲
朝夕啟沃興獻王深加寵眷辛巳上入嗣大統扈駕督潯師軍校不擾有司
既抵京陟太常寺丞晉少卿遷郊壇恪共厥職尋充國史官興修興獻皇帝
實錄奉旨典顯陵禮賜白金文綺轉光祿寺卿丁內艱服闋補原官遷工部
左右侍郎督理九廟慈寧宮奉先殿及大石窩工程裁冗費惜民力以勤慎

見稱之致仕卒子非熊上林苑監丞元玉非璧俱見選舉志

黃懋官字君辨嘉靖戊戌進士授禮部主事改吏部歷文選司郎中擢太僕寺正卿順天府尹晉南京戶部侍郎南都積貯久虛懋官按籍稽數才可給半歲乃具疏請每歲運舟之北者量留若干實南庾大司農以邊餉為重輒報罷會南京戶部尚書馬坤方考最去以懋官署尚書事既而命蔡克廉為尚書蔡至被病在告懋官仍總督糧儲綜覈名實凡以故事不領常經者悉從停給時南京設武營募健兒禦倭應募者皆江左無賴人好生事懋官稍裁抑之諸軍大怨猝然譁變懋官遂及於難守備太監何緩許搞十萬金事乃定巡撫李遂密捕首惡二十五人繫獄尋聞追枕懋官職誅首難者三人而三人已前死餘置不問懋官在選郎所郊京兆所至以精核名竟觸悍將驍兵之怒以罹於禍人咸惜之清乾隆間崇祀忠義祠希韶字如韶懋官叔父嘉靖壬午鄉薦授鹽城教諭歷常州通判解綬歸適懋官為銓曹希韶獨

杜門守己戒堵子曰先人以長孳起家不可當吾世失之若武斷漁奪直豪
舉耳奈何從鄉曲辱郡邑賢大夫權于母春秋高孝養益篤精岐黃術人以
病告無貴賤咸為投湯藥鍼灸鄉人稱為長者

鄭大同字皆吾嘉靖己丑進士授行人擢吏部給事中累陞都給事中是時嚴
相當國持要銜清秩奔走天下士大同私宅與嵩第聯未嘗私命騎一入丁
未分校禮闈楊忠愍繼盛其所得士也已陟南京通政厯太僕太常大理卿
留滯陪都不內召會大宰李默起家柄用乃引之北轉刑部右侍郎後默為
高門客趙天華奏坐怨誅下詔獄刑部案默罪大同謂默發策用事誣誤無
訛上意當除籍嵩遣人恫嚇諸曹郎謂天子切讓默罪應不賞慎勿輕附於
是大同遂目為李黨歸矣大同為經生時受業于郡生吳祿比歸祿尚無恙
持弟子禮儼如諸生時嘉靖辛酉冬倭犯四郊祿死于賊大同謹治衣衾以
士禮奠之遂為位哭泣諸寢者累日人稱其厚云弟綱綱字子尚嘉靖己

五進士歷官兵部右侍郎總督兩廣兄弟並列卿貳里人榮之
却東文字鳴周弱冠喜治古文詞嘉靖甲辰進士授永嘉知縣以憂歸服闋補
長興政尚簡易薄領稍暇以聲律自娛遷刑部主事會車駕郎中楊繼盛以
劾嚴嵩事繫西獄嵩密諭西曹郎故折辱之西曹爭希旨求媚東文獨時時
具橐饋于楊遇楊病輒佯為己病煎成藥與之既遷光祿寺丞實出家宰李
默意後默為趙文華誅謗繫獄嵩子世蕃遂指東文為李黨因以災異策免
親知官京師者爭言之東文曰吾受知李太宰太宰今坐繫即不應變亦宜
投劾行寧能鳴珂旦夕過李螺緘所不仰天疾呼乎遂即日歸構東樓聚書
數百卷結社西州之頂以吟詠自娛所著詩文若干卷黃謙字亨夫嘉靖
庚戌進士授刑科右給事中受知於太宰李默然被讒死謙亦罷歸為人慷慨
多奇節詩文典贍不俗王世懋入閩與定交焉
程拱宸字仲星隆慶戊辰進士授鎮江府推官擢戶部主事遷員外郎郎中萬

曆八年出為江西副使備兵徽寧六郡地江曠二防嚴為約束創築所屬數邑城十一年進大叅陞雲南按察使歷廣西廣東布政使秩滿擢應天府尹上僧職掌陳末議四事皆報可獨革力差一事與南部齟齬而部覆謂一體催役南北七分府臣議是也逾年陟南涼通政使南都訟牒由通政司達法司拱宸如例具訊事大者始移法司餘悉罷遣之於是訟日簡法司以贖錢無所得詳不能平南臺因疏列其事方得奉旨量移而拱宸歸矣家居獨坐一室罕與人接分守徐即登構明宗書院拱宸入租百石供講誦又置田二百石以贍族人之貧者卒年七十子棻領順天癸卯鄉薦

林道楠字廷任萬曆癸未進士授進賢知縣強直端謹蒿目為民歲饑發粟乘小艇徧歷窮鄉計口賑給夜則以舟就爰不入民舍會張江陵為相行文田法道楠躬自履畝分則定賦雖貴勢不少徇人尤德之擢按察御史歷按應天陝西廣西等處按陝時侍郎某以所親郡守屬守墨甚道楠劾之落職侍

部銜之外推不爲尋奉命刷卷京畿已視兩宮工程節省無算工竣賜白金
文綺陞太僕寺少卿道揅居臺十八年諸晚資者皆前徒泊然不以介意遇
事侃侃無所避如論太監張鯨論司馬石星主封事揅御史曹學程皆其大
者也持斧所至風裁凜然未嘗受屬吏一金京岫扃鑰卽尋常交際亦竣却
之丙午以冏卿冊封諸藩抵家病作猶強起就道卒于德州諸子甚貧海內
無不重其清素

列傳十七

明方守

楊

璫

吳輝思

魏一恭

陳光華

鄭汝舟

黃大廉

林澄源

林應標

子規章

林恭章

林煥章

方守字宜約成化己丑進士授戶部主事累遷郎中嘗督薊永及延寧邊餉出
納惟謹毫無私汙陞雲南參政部長訝其遠太宰王恕曰雲南萬里官邪賂
章用若人以剷除其弊耳時林俊亦爲其地憲副二人相與脩明法令拊循

人民土司爭官奪印歲相讐殺守撫以恩信卒用寧息因請修堡壘立學校
變其風俗焉轉湖廣右布政使以母喪歸貧不能自給常糶貸于里人御史
宗堯給以田不受晚家居以事入郡城或遊訪使其季子偕一僕肩輿嘗宴
會於士大夫家酒數行告歸蓋夜甚寒難其子之久耳主人初甚訝後知其
由大驚歎翁僉憲夢鯉曰此與陶靖節使門人同二兒并籃輿同然靖節素
官高致而方公官歷方伯清苦若是尤士大夫所難若其季子可謂善養志
矣既卒林俊言於官助其葬事弟憲弘治庚戌進士授新昌知縣政原武有
廉名子彥正德庚午鄉薦授廣東長樂知縣循良撫字綽有父風

揚瓚字宗器天順丁丑進士授吏部考功司主事時冢宰王翱性剛嚴屬察多

曲意取容瓚獨持正翱甚重之歷本司員外郎遷郎中作歲寒亭以寓晚節
嘗語人楊震以却金名世吾竊憾焉夫舉茂才而得懷金之人其智或有未
盡也却金而有四知之畏其廉或有未誠也出為湖廣參政改河南以不能

徇時歸瓊厯居要地田不增畝敵虞遇風雨則略葺之可謂貴而能貧者矣
孫皆嘉靖戊戌進士四川僉事治行有聲

吳繹思字思周天順丁丑進士授德興知縣凡賦稅差科聽訟一處之以公政
暇輒戾學宮集諸生親為課督厯端州同知陞惠州府知府屬邑有巨蠹以
法繩之丁內艱起復補潮州府適海寇發繹思發兵捕得渠魁殲之以捷聞
秩滿考成陞浙江參政轉右布政使卒繹思丰神秀整處心樂易於宗族親
舊情誼最篤早以經學名及門多所造就云

魏一恭字道莊嘉靖己丑進士為永嘉張璠所賞拔特授温州推官璠有姪在
郡獄意一恭出之至則詳閱成案竟論如律或謂非公座師猶子耶一恭曰
執之而已矣以此報座師也既奏續轉撫州同知擢刑部員外郎時巨璠殺
人禁地下刑部獄大司寇周期雍欲曲庇之一恭毅然曰法行自近不可輕
縱期雍無以奪恨甚註考不及謫潮州通判轉揚州同知未上擢廣西按察

僉事便道過家與郡守周大禮議建公田以賑廣業一里之困事具周太
助役公田記中已視學廣西點浮薄抑奔競士風一變轉浙江副使分臬四
明開府朱純行部至有議于定海中築城列戍者純可之一恭奏記曰是役
也非費巨萬更再歲不得卒工具波濤撼激勢亦難久徒勞無功也純檄守
備一恭同歷海壖觀形勢既至一恭持愈堅純不憚已復以大捷張宴一恭
語諸佐吏曰海上幸獲無事吾曹莫能效尺寸功何以捷聞強就宴定海令
具金花文綺自開府以下至材官各有差一恭獨却純目攝之一恭不為意
純倨坐不怡者良久酒數行罷後乃以他事論一恭疏發矣御史裴紳為言
一恭有盛名幼且不利乃遺疾騎追還尋轉江西參政廣西按察使山東左
右布政使廣西士大夫群赴鈐部乞留隨轉廣西左布政使往返道路僱役
買舟不馳驛無何卒于官御史入弔檢視裝篋自書籍衣服外無他物問家
僮俸錢安在云并在庫隨呼主藏吏至前具對如家僮言御史嗟歎大恻厚

賻之喪始得歸一恭生平不苟取雖交際微物亦固却察寀多警其形人之短一恭不恤也

陳光華字道蘊嘉靖己丑進士授祁門知縣有惠政丁內艱歸服闋補溧水時

河水暴漲官舍民居蕩然文廟亦圯擬就元妙觀高地改建因遷玄帝像于

他處百人舉之不得前光華為文告神曰國家養士最急神禔光大上帝必

達治理不然是淫祀也舉始行溧人稱為神君轉南京戶部員外郎歷郎中

秩滿擢雲南知府會黔國公沐朝輔薨其妻陰取他人子承襲弟朝弼請于

朝詔下撫臣勘問以光華廉明委鞠其事冒襲者持八萬金為賂峻却之廉

其子非真朝弼應襲議上報可遷山東運使歲餘擢雲南參政適世宗詔雲

南鑄嘉靖通寶錢開九龍之銅汰瀾滄江之金光華謂穴竅啟釁不可別購

銅鑄之會太宰李默被誣下獄憾者指光華為默黨落職家貧僦屋而居大

泰萬衣旬宣莆口嘗以寺租屯田為餽辭曰吾不欲以惡業遺子孫也卒後

祁門人以從祀朱文公祠

鄭汝舟字宜濟嘉靖壬辰進士授南海知縣首立均平法核豪右影射之弊邑有馬參政者其家僮拷殺園丁汝舟置之法因造毀當道會兩廣總督陶諧憾汝舟無所餽獻竟論劾之時南海霍韜為吏部侍郎知汝舟治縣無他白之改應天教授稍遷國子博士轉南京工部主事尋推課蕪湖杖毫無染轉湖廣僉事建節制西按墨吏盧令賍案漢水浸溢荆西數遭水患築長堤以捍之汚人利賴守顯陵閩廖斌主皇庄人戶侵奪齊民汝舟與御史包節大索庄戶治之轉江西參議繩王司業家子弟搏擻縣大夫罪直聲震起旋調湖廣副使卒于官汝舟事母孝居官廉以所入俸分給諸兄子卒之日室無贏金

黃大廉字潔甫嘉靖壬辰進士授長州知縣下車首定征徭立三品格輕重惟均為諸豪所憾御史因而短之即日棄印綬歸後數年他御史陳蕙行部長

洲察大廉事狂疏起吉安教授遷國子助教大理寺副出為廣東僉事度多
珠璣瑋瑁異香名屏大廉於署中書吳隱之事以自警丁內艱服闋補四川
僉事轉貴州左參議兼攝按察司布政司事羅施人素不知學大廉與講經
義親自校藝諸生喁喁知嚮學京師三殿大工起詔採木貴陽大廉冒瘴鄉
深入督採務在縮費戢民肅宗萬壽節大廉入賀以不謁嚴嵩六年不調遂
上疏乞休武選郎張紳以發蒿父子奸編戍貴陽富勃勃鄉大廉臨發馳往
問勞竟日遺紳金與之泣別歸二年卒于家復十年穆宗新政起紳都御史
鎮虔州遣使訪大廉已前沒矣紳感泣臨章水投書弔之且恤其孤
林澄源字仲清嘉靖己未進士授戶部主事遷員外郎出為貴州參議屬水西
安酋亂當事者方議用兵澄源謂蠻夷叛服靡常勦孰與撫使已而兵出殺
傷過當卒用其言撫之事遂定逾年晉按察副使備兵威清即用前所撫首
授以方略寇發輒誘禽之滇黔晏然晉參政鎮威清如故鄒進士亢標以論

勅江陵戍羅施道由境上澄源與盤桓彌日人或危之澄源曰昔徐晦越州而別臨賀后山出境而見子瞻彼何人哉吾分已定即緣此得罪吾亦安之因名其庵曰定庵轉廣西按察使入覲畢遷四川左布政使乞終養歸歸後言者復摘其馳傳事中之則江陵所嚙使也居家孝友恬靜部使者交章論薦竟不起著有悟往吟及經傳講義

林應標字君儀嘉靖癸未進士授禮部主客司主事會夷人進玉郎中陳九川驗入旋失之事覺赴詔獄九川授抵云是日為林主事直署期司隸詰之再應標佯不省坐誣服杖繫人間之曰幸為同舍郎情親遇小利害輒抗辯是市交也奈夷人笑何久之進玉者復至司隸出二人令譯者通其意夷熟視應標數搖首見九川撫掌頷之誣始得白於是朝士咸禡應標長者而不直九川擢陞江西僉事累陞廣東按察使有取夷舟獲漂物者為怨家所中置重刑先後廉訪視為已成事不復再鞫應標廉其狀白之出獄轉江西右布

政使尋轉左布政使時嚴嵩已柄國歲出籍錢數十萬市上方物輸之少府
故事率聽嵩子壻及駟僧之徒司之應標至嵩壻袁應樞復以為請堅持不
予又藏中無名錢前左使輒括之為問遺嵩具應標慎封識于權門無私覲
坐是調山西時晉府以子錢蠶食諸王子祿諸王子至不能厭糠覈應標每
散祿必召諸王子至庭以次授之晉府積空券無所舒憤乃撫他事誣訟闕
下嵩受晉印金且以前銜未已遂可其奏應標歎曰吾不念為主客尚能激
昂不置辯事乎遂促裝歸卒于家子燦章熒章燦章嘉靖己未進士未官卒
熒章字繼暉嘉靖庚戌進士授工部虞衡司主事遷營繕員外郎丁父艱
服闋轉刑部晉郎中慮囚浙江復丁母憂已補秩出為貴州副使備兵威清
時法令久弛十七司土酋常構兵逼賦熒章至約身率下諸酋漸受約束而
祖亦寢復以平中水逆苗討白泥司叛酋功兩拜帑金之賜普安州判胡士
功以墨敗下熒章按治趙中丞以姻好故為之周旋不聽坐是失中丞旨疏

論之時方有東藩之命以候劾輟行迨直指蔡廷臣按部白熒章無他尋起
補雲南左參政擢貴州按察使牙州之役當事者急首功熒章乃悉召諸護
軍為稱引古名將事誠無妄殺賊平賞賚甚渥晉雲南右布政使未幾轉廣
東左布政使下車即裁冗費議役法而大察以左使不及調時姪官甫踰月
聞者異之後謁補卒于京熒章簡質寡言似無他能至當官持法毅節可

位踐通撫而志存恬素權門要津遠之如涅生平操履酷似其父云

林恭章字爾肅深之裔嘉靖壬戌倭寇破城之夕母匿東齋樞下而舉恭章幼

孤請書刻勵居恒自誓以清脩報母恩萬曆戊戌第進士授海甯知縣不受

私請邑大姓方某據要地欲以夙憾杖一寡人恭章堅不許為所扼坐徒廣

東陽江縣陽江舊有羨稅一無所取盡以修驛舍街亭丁內艱服闋再補新

淦數月召為都察院經歷轉工部營繕司員外郎嘗街道廳長安中街厥最

繁劇五兵馬司隸馬恭章泚以簡靜諸坊肅然靡敢以寸絲質器進陞書安

知府時鄒元標在告恭章與為道義交元標每以躬行君子目之未幾轉湖
東副使雲南參政未赴轉廣東按察使分司雷廉為交趾通貢出入之所例
有羨稅恭章至榜於闕曰受交趾一物者不得生還清苦如在吉水時擢湖
廣左布政使將展其才而浩然賦歸當事者懸缺兩年始為疏請致仕居官
日有勸之營產者恭章曰吾胎而孤賴母氏以有今日今祿養已厚尚敢浚
民膏以貽子孫哉崇禎四年卒于里第居官三十年俸入皆以養母無一金
餘于清陽之情尤篤方之懸魚酌水之操無多讓焉孫友玉順治戊子鄉薦
林煥章字繼照應禾子萬曆癸丑鄉薦任永平郡同知清慎敏幹備極勤勞
門兵變煥章單騎往諭之事遂定當道交章論薦至二十餘疏推舉卓異擢
刑部員外郎晉湖廣按察司僉事備兵湖北播州宣撫使楊應龍叛朝旨命
川湖總督李化龍討之煥章飭兵督餉轉運隨征日無寧晷事平優叙錫賚
帑金蓋異數也子堯俞自有傳堯俞登第日應禾始告歸與同里結木蘭詩

社分韻賦詩每客至煥章侍立客為之局促不安應采曰小子應爾三代科第時論崇之

列傳十八

明 陳大珊 宋萬葉 陳 瑛 俞維宇 周 煥 陳騰鳳 陳元藻

吳兆元 林 費林 馮遜 林一柱 黃鳴俊 林銘凡 黃起 隋 孫 藻

陳大珊字若寶嘉靖癸未進士授兵部職方司主事歷車駕司員外郎出為廣

東鹽法僉事鹽筴貨府賈人吏胥互為奸蠹大珊祛積習却餘羨宗人某詐

受金事發繩以法廉聲大震進廣西參議會田州土目盧蘇殺其主岑邦相

督府誤以邦相病死欲右盧蘇大珊議曰盧蘇敗略稱亂弑主叛民安可蓋

也第當直叙以聞令立功自贖不及征討足矣督制置不問兩江土官咸出

怨言而藤峽之役蘇又逗留不進縱賊逸去當事者乃數督府失刑而服大

珊正名定罪之當已進海南兵備副使值征黎之役大珊部署行伍聚師數

萬程錄敘散皆出其手計簿煩碎主者緣之為奸議者嘖有煩言謂大珊囊
索厚利其實一錢不持也竟坐罷歸屏居田間足跡不及城府每愛淵明高
趣取其詩和之與託所寄問有肖似焉者晚遭倭禍家赤貧服御單陋于學
安之御史朱淵評曰廢寺閒田一無所取公門私事兩不相干識者以為知
言

宋萬葉字啟紹少時以父正命為伯父宣後事嗣母吳盡孝壬戌之變吳陷于
倭將及之萬葉徬徨乞以身代倭釋之登萬曆甲戌進士為黃州推官正歿
奔喪或謂恐礙于例奈何萬葉泣曰天下豈有無父之國哉楚撫按時為
題令為人後者得給假治所生喪自萬葉始也服闋補漢陽會江陵相張居
正賜假歸楚道出漢江鎮撫而下望風迎謁萬葉以他故不往失居正意滿
六載始遷大理寺評事後五載出守南安寸絲尺帛不取之民嘗指倭建橫
浦橋行者德之擢雲南副使值藩臬乏人兼攝敦道事夷民安堵以年老歸

萬葉官久家貧處里閭泊如也年八十卒子光台有傳

陳瑛字廷玉文龍裔萬曆甲戌進士授南京戶部主事擢舟淮陽多所釐革當事以請河渠薦改工部虞衡司主事督造清江漕艘悉以舊版佐築河又哀新版之羨者佐成高家堰河漕諸大臣交重之以塞鄭口功遷員外郎詔以都水郎中董中河事因開梁山新河經羊山至古洪十有二里又開境嶺河以助梁流費僅一萬四千緡省水衡錢無算陞俸一級滿九載復以寶應月河成擢山東參政督漕運晉廣東按察使治兵廣州已而河復決睢邳間遂召還為徐淮兵河道與司空潘季馴按行千里從負薪之役凡築新舊大隄及橫圍月隄長十三萬六千丈有奇濬故所開境山之河南北為文二百二十有六塞決口三砌滾水壩四大壩二十有二見宸斷大工錄及河防一覽中晉右使丁外艱歸服闋推原職治河而瑛已卒矣瑛平生孝友與人交坦易無他腸仕績皆在河上河壩之民至今祀之

俞維宇字憲喬萬曆乙未進士授戶部主事奉勅督稅自矢水清一洗積弊擢為登州知府判決如流案無留牘調知濟南濟南稱繁劇訟獄尤多念囚徒守候困苦凡屬縣所解隨至隨訊輕重悉當其罪獄無滯寃陞山東副使歷參政捐俸首新孟子廟刻碑紀事已而按察蘇松所至釐奸剔弊吏不敢欺公退職即與部下諸生講論文藝日夜不倦如顧宗孟許國榮馬世奇吳偉業皆所得士後並知名於時轉廣西右布政補湖廣左布政除各縣火耗一遵部領時魏忠賢勢熾甚各直省鄉試榜俱欲得魏姓前列以媚璫諸司希意承旨當楚榜將發內外當事者榜徨惟恐失姓魏人致干部中敵甚維時為提調獨厲聲曰朝廷立賢無方謂何至公堂上豈容徇私而務搜得魏姓以為聲援地乎以此忤意遂拂袖歸闈古意亭與賓朋賦詩道進田野淡素如經生人不知為故時方伯也璫敗部擬推為巡撫會丁內艱服未闋卒年五十四

周煥字鉉吉萬曆丁未進士授曹州知州明習吏事每鞠獄不數言立剖發奸
弭盜境內肅然軫差役賠累之艱建均徭法粥饑者藥病者罪人贖錢許民
輸以布絮因製寒衣以給貧民又置學田以造士臺章文薦有治冠三齊之
稱擢兵部武庫司員外郎出為湖廣督學焚故才藪煥精於識鑑竟陵譚元
春謝場屋業強起拔冠多士遂發解楚省他所首拔者金聲譚元禮歟湯添
楊兆儀皆成大名陞參議分守荆西時川貴用師兵餉絀煥外攘內戢備
極拮据征蜀兵過荆兵縱暴有司繩以法幾激亂煥曰巡撫執法峻督而自
以軍士遠征勞苦代請寬政威恩並行家始戢有奸民仇某甲乃詐為其人
謀亂書與獄囚約內應者故委於道吏得之大怖煥曰此反間也第密伺之
當再至奸果獲諸如練衛軍審編派設哨船制軍備皆蚤計網繆不張皇而
事集荆西人德之卒于官年僅四十孫鉞見選舉志

陳騰鳳字鳴周萬曆丁未會試第二人授開州知州州多巨慝習弓馬乘寒騎

要截行叔商旅畏途騰鳳廉得其實以計誘渠魁立殺之賊徒屏息澶淵久
因水患騰鳳設法隄防民得安堵丁內艱服闋補禹州徒調太倉州妻有隱
糧七千五百餘石或為田衝蕩或為冊漲混者民困輸供騰鳳不避勞怨迹
一洗刷遺累洒然陞兵部員外郎出為河南提學僉事秉公矢慎首拔者悉
入彀有河洛元魁卷錫行于世部覆稱最加銜再任轉浙江糧儲副使以卓
異薦離任日却美金三千充公儲乞歸養家宰趙雲星覆疏有人方仰其有
守而有為而本官則已知止而知足家居二十載杜門守靜所著有四書講
意尚書要言及虛靜齋集卒年七十有二

陳元藻字爾鑑萬曆庚戌進士官行人陞禮部祠祭司主事會日食疏言陽掩
于陰刑餘之人豈可使預國家事魏璫見之大恚欲置之死首輔葉向高力
救得免尋出為江西參政大司農檄徵南糧抵浙直水滂之數元藻以端病
民欲挂冠歸民遮首留之相率輸將恐後元藻又出其俸餘補加耗躬督以

行遲達長淮時清兵抵寧遠城下邊事告警漕撫復令督至天津權使以非舊例阻元藻曰國家視寧遠為安危寧遠視津糧為飢飽此正居子_洪之日遂屬衆前往軍儲獲濟晉廣東雷瓊分守當寄其子書云人言雷州出葛予不見一尺人言廉州出珠予不見一粒惟瓊州有邱文莊集可寄汝耳擢貴州布政使以父老疏乞終養歸結茅於梅峯之麓托詩畫以見志所著有頌吟詩集年九十餘卒

吳兆元字公策萬曆癸丑進士授確山縣知縣邑民甚樸憚輸官里甲侵攬多逋負兆元為設徵收畫一之法宿弊頓除決獄精敏邑無滯囚監司竒其才雖他獄皆委兆元決之民亦以得就確令平反為不冤秩滿行取父老遮道攀轅數十里不絕至京選刑部河南司主事改工部都水遷屯田員外郎陞營繕司郎中營繕歲供大木商侵蝕不肯兆元謹覓齋獨無所耗出知韶州政平訟簡務與民休息給軍餉以時大得士心郡諫樓火兆元整衣再拜火

為之滅人以比劉昆時魏璫之黨崔呈秀以同籍相慕兆元絕不與通懷宗初賜宴天下入覲郡守廣異者四人兆元居第一遷江西參政備兵湖西崇禎二年冬賫捧入賀至山東聞清兵薄燕京都城告警眾皆逗遛不進兆元歎曰吾等數千里上天子壽愧不能紓君父急奈何捧頭鼠竄乎叱馭益疾俄而素崇煥率援兵至京師解嚴詔趣諸賀者進兆元首入咸嘖嘖嘉歎三年遷江西按察使備兵南贛南贛常患盜兆元視賊勢最急者當之賊憚不敢犯十六縣皆得安堵陞廣東左右布政使改廣西兼視鹽政西粵不產鹽當得東粵協濟銀八萬代以鹽及運至省舵工例得貨餘鹽自利而實侵官鹽正運道負遠繫不得釋兆元曰法當清其源空因此輩何益乃飭以先公後私公入立增繫者乃益寡八年遷雲南左布政使廷議增雲南餉額十二萬兆元竭心力區畫澳以免困舊例每歲辦貢金二千兩久蠲復徵以說乃取缺軍廩以代且請暫徵一年後仍停免民德之十二年冬入覲陞右都副

御史巡撫雲南十三年春召見平臺賜銀幣及御前果品曰朕以酬萬里勞
臣也兆元因陳撫馭機宜上獎勞有加抵任益務寬簡駕馭土司捐其細邊
咸遵約束嘗奏增解額三名又奏立黑井儒學甲申李自成陷關兆元聞變
慟哭急索軍費遣將統兵至金陵復仇時督撫以兵至者獨滇南耳閩中道
阻兆元痛故社已屋矢躬盡瘁卒于官年七十四歲子應禧扶其喪歸孫鴻
燭見選舉志

林贊字寅宣萬曆丙辰進士授戶部主事陞員外郎出知金華府擢湖廣兵備
副使遷浙江參政值溫臺海警勢時攝道篆申戰備嚴守禦寇為遠遁轉江
西按察使廣東布政使舉卓異陞副都御史巡撫廣西值寇迫全州桂師求
援贊移還全州調度兵食擒賊奏凱靖江王有叛意欲邀贊城外觀操贊謂
親王不宜典兵祖制也且出城有禁王又遣言土司願共伐安南自備兵十
萬止藉撫軍一檄允其統率可成大功贊以無故用兵屬國非請旨不可王

知其有備遂不敢動撫粵六載綱紀肅然貪墨吏望風解綬去甲申鼎革予告歸寓居榕垣卒年八十二林鳴璫字朋石贊從兄與贊同年進士授諸暨知縣遷戶部主事出監淮安稅不避權貢棄官歸

林一柱字元功天啟乙丑進士知陳州調汝州時魏璫焰煽中外天下建祠祀之河南撫按檄徵各屬金一柱獨拒不應直聲滿中原璫誅遷戶部員外郎彈心稽核一時堂咨部覆大司農皆以屬一柱京師論戶部司屬精覈計熟故典者必推之出為當州知府丁父艱服闋補吉安吉篤有白鷺洲書院祀歷代名臣為先正講學處歲久且圯餼供不給一柱捐俸新之置田廩士民尸祝之尋陞嶺北僉事至贛繫左道張善薇誅之轉山西按察使陞布政使未蒞任擢右僉都御史巡撫贛南先是嶺南八排寇蔓延虛穴不可割一柱至集兵來銳不數日賊次第削平分兵討漳寇平之張獻忠蹂躪全楚甌江右一柱預為防備獻忠不敢近豫章甲申賊陷京師一柱北向痛哭率師勤

王露卧宵馳得沈疾遂不起卒于賴

黃鳴俊字啟甸萬曆己未進士授諸暨知縣調會稽以儒術飭吏治人驚若神明舉最擢禮部主事時魏璫勢張威羅名士為己用鳴俊屏跡不與通以殿工晉員外郎鳴俊念殿工出璫濫恩具疏力辭不允擢浙江道提學參議改抗嚴兵備道轉參政移督江南糧儲公署故在宜興相國周延儒馳使以私迎請鳴俊避避駐常熟周卿之改山東督糧思宗知鳴俊能特簡右僉都御史巡撫浙江鳴俊在浙最久以時艱方急浙江為財賦區可倚以控制南北因剔奸振蕩禁債帥汰虛伍頒營制備火器親行練習旌旗壁壘煥然一新甫三月李自成陷京師鳴俊灑泣誓師值馬阮柄政阻天下勤王兵鳴俊痛勢不可為解綬歸唐王即位福州改元隆武召為兵部侍郎晉兵部尚書拜東閣大學士賜尚方劍封國公時鄭芝龍叛帝決幸贛鳴俊危從至延平清兵至帝及于艱械鳴俊至福州授五品官以老疾辭歸憂喪卒著有靜觀軒

集

林銘凡字祖焮章孫克俞姪天啟甲子舉雙經第一崇禎戊辰進士授中書
舍人擢湖廣道監察御史疏論流寇蔓延防入楚則鄭撫宜揚兵襄樊防走
吳則淮撫當鞠旅顯壽防齊魯則東撫急須簡練清濟控制濮曹其所策劃
皆中機宜又疏參總兵張應昌觀望守道李春旺退縮識者題之乙亥督餉
兩浙別蠹弊甦商困疏捐羨餘六千三百餘兩解助兵餉有實切減此後食
之語丙子巡按江西風節自持吏畏若神明立朝素著平采忌者用鄉里族
人事出之時論甚為不平轉山東按察副使視篆數日即請病歸構北村別
墅初衣自適與二三社友觴咏自娛宏光改元屢召西臺堅卧不出蓋知大
厦將傾非一木所能支耳自是殷憂積疴長歎而逝銘凡善畫見畫人傳性
孝友視姪如子祭田祠宇躬自任之與維楊李清交最善後未清於垣中取
銘凡考選御史卷託余屬致還中有屯田影漏單農交病鹽引輕重商民兩

窮並條舉實歲備邊之策字字碩畫惜當時未能聽用也子濟芳孫佳棟皆能讀父書曾孫麟煇自有傳

黃起有字應似希詔曾孫崇禎戊辰進士選庶吉士授翰林院編修直起居注丁丑分校禮闈陞國子司業署祭酒事訓課規程六館稱焉歷左中允左諭德經筵日講官掌制誥時國步方艱帝銳于治廷臣議論日繁無裨實用起有處綸扉禁地調劑委曲入代絲綸簡質嚴重勅中機宜中外體之己卯典武順天所得士後多躋公輔如成相國克鞏杜相國立德其最著也陞禮部左侍郎兼翰林院侍講奉使江右過長洲聞甲申之變道梗以母老歸母歿時起有年迫七十猶為孺子哭林居時登臨贈答皆貧交故舊無一語及顯榮者卒年八十二著有懔山詩集若干卷

南陽縣志

卷之二

莆田縣志卷

列傳十九

清

彭

鵬

劉渭龍

張松齡

程甲化

朱天貴

吳英

陳維屏

子執

陳

斌

游崇功

聶國翰

林

源

子大章

翁方綱

郭尚先

林揚祖

吳鴻賓

彭鵬字奮斯文賈曾孫順治庚子鄉薦康熙十三年耿藩叛逼投偽職誓死不
汙乃緝病却粒偽使至鵬盡銜牙齒出血示之三年堅卧不下林事平丁父
艱服闋授三河縣知縣地瘠當衝要旗民雜處公拊循釐剔不畏疆禦有中
夜矯傳密旨者鵬察其詐延與語陰令人發其囊果詐也立擒解伏法鄰邑
有疑獄憲司委勘鵬陳不敢附會者十卒白其寃有為旗人誣控毆主者七
人應駢斬鵬辯其非立脫七命每有盜發輒單騎往勾攝發摘如神吏民不
敢欺請罷公私徵索增採買米價牒數十上上司持不可至自劾乞休必得

請乃已能聲振畿輔二十七年上東巡召詢家世年齒及在官狀甚悉且曰汝年五十而齒俱落何也鵬以在籍不從逆狀對上大悅賜帑金三百兩諭曰爾居官清正不受民錢以此養爾廉勝民間銀數萬兩也明年順天府尹許三禮劾鵬獄遲玩詔巡撫于成龍察核白其枉部議削職詔降二級留任尋以盜案積降十三級皆特旨留任二十九年詔舉天下廉能官尚書李天馥首以鵬薦與嘉定令陸隴其并行取同薦者四人引見擢鵬第一需次請假歸葬即家授工科給事中趨赴闕會闕中旱蝗赤地千里公一日三上疏言晉秦豫三省有司不恤民狀先是西安鳳翔平陽等郡饑詔發帑賑之又命河南運米十萬石濟陝西至是以鵬疏下所司確議令指實再奏鵬復指涇陽令劉桂魁扣籽粒聞喜夏縣匿災不報猗氏縣令李澍敲斃災黎磁州牧陳成郊濫派運價夏縣令尚崇派銀包運南陽守朱璘昧分肥狀詔各巡撫審察不皆實議處如例得旨寬免三十三年順天學政李光地丁艱

上命在任守制。鵬疏言：李光地閱罹母喪，宜哀慟，懣情得請，乃已。然後聖主擇人取士之心，以先地固辭，而彌見光地為子奔喪之孝。得聖主俞允，而益彰恩以三年之喪，請為九月之假。於禮則悖於情，則乖聖德。倉容不忍，明斥其罪。臣以為不可留者十伏。讀上諭十六章首敦孝弟以重人倫，督學風化之表也。不乞守制而請給假，非所以體上諭教孝意。不可留者一。臣前任三河知縣，恭逢太皇太后祥宮經臨，伏見校尉換班，聖躬護視，天顏哀痛。至今追慕真誠，亘古仁孝。臣民皆當則效，不可留者二。光地與臣同鄉，臣踴躍涼涼，歲一二至獨聞其母訃，即時趨弔，聽其號泣，慘若嬰兒肝腸寸寸斷矣。勉強衡文，必多恍惚，不可留者三。先達閩變，頗矢忠貞，未聞不孝而能忠者也。請假九月，疏出天下皆議其後，不可留者四。弗請終制而請假，清議沸騰，有不赴弔者，以談理講道如光地為主，為璋倏忽反裂，不可留者五。光地疏云：殘喘自効，請假九月，不誤學差。僉謂九月大功服，談言微刺，不可留者六。定

例生童匿喪應試褫革嚴處萬一犯者起而詰曰侍郎哀經何至此光地無辭以對不可留者七學校所以教天下忠孝故堂曰明倫光地不祥之身儼然而登奈橋門環視何不可留者八上諭臣子禮義廉恥難進易退光地今日禮手義手進退何據不可留者九宋臣富弼母喪五起之固辭且曰金革變禮不可施于後世綱目大書以垂訓後世宋孝宗起復劉珪六疏固辭綱目書曰固辭予之也皇上克舜比陸教忠教孝必無辭之而弗允不可留者十疏下九卿議從之癸酉北闈榜發與論涕禱光地疏劾舉人楊文鐸等文理荒謬磨勘官馬士芳有通賄情弊下九卿察議以文鐸卷有疵累應罰停一科別無情弊鵬奏涉虛有旨令回奏鵬言會議諸臣聽考官徐惇彭殿元飾說故入言官罪上特免處分考官休致甲戌會試特簡分校得佳文必焚香告天所取皆知名士居言路歲餘言無不盡舉朝側目詔解任以原品出効南河三十六年召補原官明年擢貴州按察使九月起擢僉都御史巡撫

廣西墨吏望風解印綬去喻兆紳葉之常皆以貪酷免粵西山多田少正供無幾而橫徵私斂率浮數倍鵬爬垢櫛穢積弊一清上以科場弊竇馳使問直撫李光地河督張鵬翮及郭琇彭鵬各抒所見鵬條履多見施行著為令廣東舊未設武科至是奏行之三十九年調撫廣東下車日收民詞五千紙公慨然曰堂上一點硃堂下千點血健訟何為民感悔值歲旱文禱烈日中親詣獄慮囚甘霖立至連陽猶叛上遣大臣率禁旅會剿命鵬調軍食強人帖服癸未春萬壽節推廣皇恩詣獄按囚釋株坐者三百人開倉粟平糶以惠貧民杜加派名色數十萬兩奏免粵西解京銅鐵七萬斤歡聲載道蕭永藻代為廣西巡撫上諭以效彭鵬所為其為宸眷所知類此四十二年冬病篤上特遣中書一員馳驛往視次年正月卒于官遺疏上奉旨有實心任事克盡勤勞之褒交部議恤典賜祭葬粵人肖像祀之入名宦祠鵬精敏彊毅膽識過人直聲震海內天下並稱曰彭郭未仕時嘗倡修木蘭陂水利設粥

厥以活飢民而學校事尤極力維持自諫垣至開府於學使者半刺不通遺命以八百金濟城內西湖邑人附祀岳公祠乾隆六年上眷懷舊德疊旨褒嘉有治行卓越操守清廉之語榮及身後著有古愚心言八卷中藏集一卷兩粵疏抄萬壽教福集若干卷行世 劉湄龍字秋水康熙丙午鄉薦耿逆偽命徵召時丁母憂不赴與彭鵬書云不孝虛有其表恐不獲脫惟衰經不祥可免耳如中我者以出嗣降服不孝禍無日矣人言草莽非食祿受恩比何自苦然青岩唐布衣耳王蠋處士也七十二城一書生豈盡人臣我等於鄉貢則稱臣受邑銜則稱臣名義至重有死而已瀝血書此尋病卒可謂義士矣

張松齡字鶴生順治乙未進士改庶吉士嘗扈從遊南苑賦詩稱旨賞賚優渥特擢禮刑二科給事中疏選官者留京守候甚苦悉聽回藉候憑仕途便之奉命清刑獄多所平反疏錢法利病不挽於勢出為四川參議四川經張獻

忠之亂郡邑凋敝士民失業所存孑遺竄入四土府松齡下車贖回難民七千有奇歸時給與牛種極意撫循流亡者漸獲爰止土官利接壤荒地欲得以為畜牧陰遣重寶賂左右或有為之緩頰者松齡曰尺地為朝廷守安得妄以與人重責言者而止京師三殿役興詔取楠木民苦莫辨松齡詳請以為四川久經喪亂梗稗豫章為寇盜焚燒殆盡詞至懇切乃獲免大計卓異賜蟒服因裁缺歸甲寅耿逆變亂逼松齡起弗應被逮幽囚數閱月屢遭敲拷終不屈卧幽濕地遂成瘋疾卒年五十八事平上軫念蓋臣賜卹世襲雲騎尉周替

程甲化字季白順治辛丑進士授諸城知縣諸邑積逋二萬餘前令坐殿羈滯者踵相接甲化設法清數兼併包攬之弊一剔無遺癸丑丁內外艱歸值耿藩之變勒授偽職甲化毀形赤身示不堪用拘至省囚禁迫脅不從子大章同繫獄歷受慘刑矢死成父志大師光復補旌德知德益勵冰操吏不敢干

以私旌俗刁悍每藉人命劫掠鄰里疊案株連久不決甲化嚴禁飭服毒死者官給瘞埋迅讞決民甚德之甲子以治行擢吏部文選司主事歷驗封考功員外郎稽勲文選郎中晝夜繙閱故牘搜剔利弊凡銓敍次第進退可否比例較勦纖悉畢照或謂其過勞甲化曰若爾則掌簿吏唱名足矣何用吾輩為必視樊實所在就中調劑使賢否澄清弊不得逞眾服其確論陞通政司左右參議太僕寺少卿甲午典試四川轉大理寺少卿卒年七十著有拂秋堂詩集子大章由歲貢授永春壽寧教諭倡修學宮丁丑歲荒捐粟賑飢桑梓德之

朱天貴字達三幼隨父避亂福寧三沙及三沙陷天貴被掠渠帥竒其才厚遇之鄭氏久踞海上授左都督統樓船二十八鎮出沒閩海總督姚啟聖密遣所親勸其歸順康熙庚申年天貴遂部三百餘艘及眾二萬餘來歸特授平陽總兵官癸亥啟聖疏請調天貴征臺灣經營方略檄檣劍盾靡不整飭夏

六月靖海將軍施琅率水師至澎湖虎井澎湖為臺灣門戶鄭氏併力拒守以百餘艦迎戰砲火齊發眾莫敢近天貴坐舵樓直進直薄砲城下燒敵船殺傷甚眾敵壘上見天貴指揮直搗飛砲交發適中天貴死於舟中施率水師繼進連奪六嶼之險臺灣遂降天貴瑰璋岸吳勇敢等先人莫能當其鋒卒時年三十七事聞贈太子少保諭祭賜諡忠壯廕子源淳知州歷官濟東道

吳英字為高先世居泉州之黃龍康熙二十二年奉旨入籍遂家于莆之定庄英瑰傑負大志康熙二年以平金履功授都司甲寅耿藩之變英為浙提左軍游擊屢建奇功會寧海將軍貝子富喇塔視師兩浙詢諸將堪膺鉅任者提督塞自理以英封授為先鋒前後克黃岩太平樂清青田象山等縣解處州圍破偽帥曾養性于温州殲海寇張拱垣朱飛熊于毛頭洋復收捕遂昌松陽等山寇水陸數十戰英皆有功戊午擢副將任閩浙總督府中軍時海

氛未靖下游諸郡數警英出奇兵敗敵于三頃觀音山江東橋所向皆捷次年擢同安總兵率舟師平金厦壬戌移鎮興化適提督施琅疏平臺澎湖以英統陸師為副英誓眾登舟先取八罩占上風奮勇直前遂克澎湖凱旋入覲溫旨褒獎賜鞍馬衣袍調鎮舟山甫閱月陞授四川提督鎮蜀十一年威德並著首蠻懾服丙子遷福建陸師提督未幾調水師殫心經畫東兵弭盜海疆戎務無不悉力舉行癸未春上南巡閱視河工英迎駕年六十有七較射三矢貫札上大喜御書作萬人敵額賜之己酉丁亥兩次迎駕以年老乞休上再三慰留賜御書匾聯加授威畧將軍壬辰夏復賜詩存問詩云水陸封疆百戰駕艤船蓬臺遠漢鯨浪島嶼平開鋒火煙將老偏宜是秋卒于官立壯志宸襟每注施恩延波濤有作須先靖冠勉防微截未然舍年七十有六贈太子少保欽賜祭奠英仕封疆四十年信賞必罰喜怒不形人臣之道無缺至敦族睦鄰置義田賑凶荒修興泉文廟重修熙寧寧海二橋其居鄉之善尤有足稱者

陳維屏字選士其先江南常州人父明隨征授興化守備遂家焉維屏負才略
總督姚啟聖命以千餘人抗抗泉南攻克東石奮勇先登題授興化鎮左營
千餘人隨提督吳英克復澎湖招撫臺灣以功加左都督陞陝西寧夏鎮游
擊召見乾清宮賜蟒服宴光祿寺旋命率師扈從西征噶爾旦屯守德金策
應糧道五月大帥凱旋甕金未奉撤還孤軍吳域草枯食盡至九月始令班
師維屏以師歸無殿敵人乘虛來躡必為所殲自領斷後敵果以萬眾追及
維屏祇餘千餘騎自寅至未奮命鏖戰兵矢俱盡猶振臂呼斬殺數級身被
重創渡三义河卒詔賜卹典祭葬子鉞字子昭年十五以廕襲引見欽點御
前侍衛越五載請假歸娶奉母至孝依依膝下雍正元年補詔安守備歷調
銅山長福閩安旋奉制府阿爾賽委赴臺巡查適免番竊發提督王郡知鉞
智勇兼備令帶兵五百防守竹塹分路禦敵鉞枕戈待旦嚴為警備敵聞風
遠遁師旋以積勞病發歿于錦江旅舍制府哀悼給帑金三十兩營葬仍請

軍功題請議叙奉旨嘉獎廕子紹勳入監

陳斌字朝岐幼習儒業兼通韜略值閩多故乃投筆從戎康熙癸卯秋以戰功
剴授都僉事甲寅耿逆變作斌領先鋒征勦克壽昌遂安二縣逐土寇于渭
平鎮擒其魁汪匪石等殲之旋破耿逆木城焚其營巢進攻大溪灘奪僊霞
關恢復建延諸郡邑順流而下耿逆就俘省會悉平叙功授福州城守中軍
時海氛方熾總督姚啟聖知其才調赴漳州連克陳州等一十九寨并克復
金厦二島授左都督世襲雲騎尉康熙癸亥隨靖海侯施琅師出銅山擊殺
印輝等克澎湖三十六島全臺就撫加襲騎都尉遷南陽鎮中協誥授榮祿
大夫己卯春乞休歸里年七十卒斌性沈毅慈祥每遇敵身先士卒功成身
退優游林泉食一品祿可謂將中罕匹者矣著有越游臺南溝水諸詩集孫
宗溥以廕襲封騎都尉官總兵

游崇功小嶼人少列戎行驍勇知大義屢建戰功歷任臺灣安平鎮左營游擊

康熙六十年朱一貴竊發陸路被擾崇功統水師官兵出哨海洋聞變迅航
入臺同主將許雲殺賊敵衆繁多雲與崇功竭力戰死大阡進勦臺地悉平
臺民以崇功忠靈建祠祀之總督滿保具文致祭疏聞恩賜祭奠廕子金閣
以守備用當大師平臺時金閣偕其昆弟金闔金閻從昆弟金輅金耀金簡
俱隨師復仇云

聶國翰其先江南和州人父昱張任興化游擊遂籍莆田國翰弱冠嫻騎射馳
勇絕倫由臺灣把總以功陞陞游擊康熙十六年值臺警總督覺羅滿保令
協辦軍需授象山副將施粥賑饑民德之擢金門鎮總兵調南澳歲款國翰
捐貲運米分別賑濟全活無算性喜儒術創建義學令軍民子弟成就誦讀
增置學田以資膏火尋卒於官贈都督祀忠義祠

林源字奕逢先庭曾孫父儀性孝友先世遺物悉以讓兄名聞臺序耿藩之變
雖克悍不入其門不犯其里早歲而鰥誓不再娶旁無媵妾惟源侍旁源先

意承志色養無間父歿哀毀骨立宗邦無間言讀書博洽尤精壁經康熙已卯魁鄉薦授望都縣知縣大師征阿喇布坦源履任甫數日承辦軍需及協濟邊驛大師經由芻糧故事勞費在民源盡蠲而獨任猶竭蹶增修文廟達聖域賢闢二坊及文昌祠重修堯母陵唐帝廟立義學進士凡差使往來知其清慎方正弗敢需索辛丑春上命九卿詹事科道各舉所知宮詹梅之珩奉命祭告山川過望都特薦源行取入京御試第一方假旋世宗召用實授工部屯田司主事時陵寢立碑工費近三十萬吏執舊案要以重利源嚴斥之估算得法省水衡錢無數至祭祀所需之物預備製造之項嚴杜浮冒盡去陋規每議稿呈堂上官皆歎服特加敬重科道員缺上命堂官保舉擢陞監察御史管五城街道巡視西城兼刑科掌印給事中旋命督修玉田城垣以工代賑源履地查訪知境內還鄉河為害淹浸田廬遂奏請以河工易城工上從之源日在河壩督率工程力除尅扣民受實惠河慶安瀾以功議叙

上必諭以尚先為法而天不假其年不竟其用為可惜也尚先與林則徐同館而後一科館相國盧蔭溥家相國時招則徐與尚先共策談掌故也朝士罕與焉戊寅大考翰詹相國辭閱卷大臣上曰汝西賓寫作俱佳必在前列宜汝以遠嫌辭也閱卷者因競覓尚先卷誤以書法近似者當之而尚先竟乙置焉上雖未加特擢而深信其無弁競矣所著有進奉文一卷經筵講義八卷增默庵文集八卷詩集二卷芳堅館題跋三卷使蜀日記一卷子錢齡見儒林傳

林揚祖字孫詔號岵瞻七歲孤母翁氏親授以經史長受業於郭大理尚先道光乙酉拔貢是年鄉薦第一己丑成進士籤分刑部主事陞員外郎記名御史充方畧館纂修庚子典試廣西己酉充順天鄉試同考官庚戌入直軍機處總辦秋審稽查漕糧普濟堂飯廠國子監事務稽查京倉時奏陳利弊宣宗嘉納為旋奉命巡視南城北城壬寅乞歸終養祖母乙巳入都補授湖廣

道監察御史擢兵科給事中轉工科掌印給事京察一等記名咸豐辛亥簡放河南開歸陳許兵備道甫蒞任革除積弊省河費五萬餘金河帥慧某稱爲明體達用奏請賞戴花翎陞河南按察使癸丑粵匪擾汴省巡撫李某託辭東巡逗留歸德揚祖與提督

謀固守以待援兵捐俸二千餘金購

米六千石給糧餉益募民兵固守五月十三日粵寇以數萬衆圍洧城是時

城中兵僅五百勇千餘揚祖令民老幼皆登陴守禦大雨連晝衆親自免寇

巡督誓與城存亡寇迫東門兵勇爭先殺敵發大砲擊散之三日賊遁汴城

圍解提督議與揚祖聯銜報捷揚祖不可曰吾等不過升官再而撫臺則有

身家性命之危仍請回汴領銜入告賞戴花翎加鹽運使銜特旨署河南布

政使旋授陝西按察使陞授陝西布政使調甘肅布政使吏畏民懷四境又

安治行甲於諸省己未入覲召對七次多所指陳特旨署陝甘總督適值閩

兵大典廷旨命揚祖出巡甫數屬新督蒞任怒其越職適大計考語以年老

力疲難膺方面上之奉旨原品休致家居二十餘年歷主本邑擢英書院本
郡興安書院及遊永春廈門各書院山長居官廉潔歸田日貨山西滙局
千金為川資歸數年斥賣衣物價之光緒八年卒年八十重遊泮水享年八
十有五子壽熙以優貢生中書官陝西潼關撫民同知左宗棠用兵新疆襄
辦軍需以勤勞著卒于官壽熙試用訓導壽熙舉人內閣中書壽燕邑庠生

壽照

戶部主事升郎中監督京倉庚子拳亂卒于京見傳文忠撰壽文

吳鴻賓字雲笙

光緒

乙酉

科拔貢

朝考一等

以知縣用

分發浙江

初任發審局

委員有貢生某

與其庶母爭遺產庶母有一女某貢生謂有子為妾無子為

婢女子不應承繼財產案懸累年未決鴻賓詰之曰論語云南容三復白圭

孔子以其兄之子妻之女子非子而何某貢生語塞遂定讞大吏奇其材委

署海鹽縣知縣上憲通令各縣錢糧每兩加征二文鴻賓以民窮力絀且詳

請減征十文民大悅次年調補天台地僻民貧號稱難治鴻賓興利除弊事

無不舉期年調臨海邑依山濱海寇盜縱橫歷任緝捕監押者至五百餘人
鴻賓以此輩生之不得殺之可憫因邀紳籌建遷善所捐俸立綿紗廠延技
師教之時有王某為軍官奉令回籍招兵鴻賓詳請以獄犯應募使之戴罪
立功犯人喜慶更生調補杭州府錢塘縣時與長樂高鳳謙新會梁啓超為
友談論新政閩縣林啓守抗與鴻賓皆閩人相得益彰未幾可母報回里服
闋浙撫廖壽衡奏保以知府用加道銜晉京引見時粵西匪亂蔓延朝旨命
岑春煊督粵檄鴻賓為省防統領數日以積勞咯血假歸浙撫張曾揚奏調
回浙任統捐局總辦光緒三十二年皖變起鴻賓見時事日非浩然歸里既
志遂決民國二年張元奇為福建省民政長擬畀以道尹職促赴省力辭之
沈瑜慶纂省志聘襄其事卒年七十鴻賓精書法行楷習聖教序晚年猶臨
池不倦云

列傳二十

民國 陳乃元 溫彥斌 劉季鴻 陳 樵

陳乃元字愛吾邑諸生遊學日本警察學校任勵青小學教員暗示革命宗旨造就人材極多民國二年被舉為省議會議員袁氏當國解散國民黨乃元遊滬履深自藏匿七年護法役起乃元崎嶇永春南安安溪等地間關至粵因薦隨靖國軍司令方聲濤入仙遊任軍法官陳炯明回粵閩地悉歸北軍統治乃元在廈門任集美女學校校長時莆人在廈充教員者多出門下名譽大起十六年黨軍伐閩充福建省政府臨時委員解職後病疴在里十七年楊樹莊任福建省政府主席康乃元簡任福建省政府委員兼民政廳廳長楊樹莊病代行主席事務肅清吏治考選縣長憑真才去取不徇請託時福建民軍狙擊閩舊習各據一方把持政務乃元極力裁抑因是招怨十八年閩變事起盧興榮派兵挾省委程時奎林知淵許顯時林忠及乃元等西去囚禁尤溪乃元時已病肺抑鬱而終年五十事平國府賜卹金三千元治

喪公英于筱塘山

溫彥斌字起凡體貌魁梧幼時讀書輒解章句年十六考入興郡中學堂轉福建陸軍小學肄業保送保定陸軍中學堂畢業回閩以排長用升十四師四標一營隊官福建光復後事出力授二等勳章升五十六團一營第三連連長壺匪之亂隨孫葆璋不背著有功績民國五年擢陸軍第五混成旅旅長兵第一團第二營營長漳州伏莽賊迹七年獲法之役粵帥許崇智招入黨軍次年轉戰江東入廣州十年隨國父北伐師出韶關適陳炯明叛變復自粵反旆同聯軍驅陳充支隊司令改任團長十四軍潮梅廣州相繼底定調充國民革命軍十一師副師長治軍石龍奉令解散彥斌開說利害喻令所部遵令秩序晏然咸受約束十五年北伐任東路軍第四師少將參謀長入閩驅周蔭人事定赴南京充二十二師少將參謀長十六年八月孫傳芳糾合張宗昌所部統攝十萬眾乘機渡江犯龍潭軍政部部长何應欽電詢戰

畧彥斌主先據接霞山居高臨下必操勝算應欽從其言撥桂軍增援盡殲
逆軍是役也考斌歷四日晝夜不睡坐是略血中委李濟琛致書云江門前
事歷歷如繪龍潭戰役實况照然凡此戰功胥為史料不僅資談助也台端
功在黨國從薪之謀未獲褒叙良用惋歎君子立身處世但求有益國家一
己之榮辱得失可以不計嘉謀入告退不言功亮節高風費乎尚矣彥斌覆
函謂得一知己死且不朽異日當勒諸墓門不求人撰志矣十七年任軍事
委員會軍械處科長翌年入陸軍大學畢業後任軍政部陸軍軍械司檢
驗科科長二十五年從潤蘇浙贛邊區清勦總指揮部高級參謀改豫鄂邊
區主任公署高級參謀隨衛立煌往西安猝逢事變彥斌率全部集中險地
保全槍械二十六年七月奉委兼攝霍山縣長旋充豫鄂皖邊區督辦公署
辦公廳主任調升中將高級參謀兼第一第二戰區司令長官駐陝辦事處
處長授中將三十一年春以母蔡氏年高促回甯途次勞頓以七月六日遺

病卒年五十三彥斌習太極拳好佛學臨卒遺囑云母好佛兒已成佛則母為佛母時藤縣劉子衡寓其家代理後事遺骸火化于南山廣化寺

劉季鴻字幼笙父緒系出冲沁姚氏故復姓姚幼習武事時劉燕統帶長門安

塞砲台季鴻同母兄也往投之光緒十九年考升砲首學習水旱電畢業十

九年督砲隊赴臺灣征服栗番授千總二十三年管理七娘學臺台兼電光

礮臺總教習二十五年又聞口練習礮術經美國教習達爾幹考取超等第

二三十一年調充厦口四礮臺總教習福建水陸提督洪永安調赴泉州辦

理門案以勞績授管帶胡里山砲臺三十四年美國艦隊來華朝旨命員勒

載洵持節駐厦招待派季鴻兼管磐石礮臺辦理彈壓事宜部署嚴整周旋

外賓歡洽無間禮成奏獎有加宣統元年派安溪辦理巨案積資保文職以

知府用辛亥光復海內洵洵海洋盜匪充斥以紳商請籌辦水師巡緝隊獲

巨盜甚眾地方安堵民國元年補授陸軍礮兵少校二年統帶厦口四礮臺

三年授中校獎四等嘉禾章五年授上校任廈口要塞司令十三年春臧致平據廈門海軍砲艦圍廈四十餘日憚李鴻章砲術不敢窺廈口一矢致平親督砲臺令發砲攻軍艦李鴻章念軍艦係國家巨款製造非供軍閥私鬥在兩難間乃按准發一砲中軍艦旁各艦震懾退伏金門數十日不敢出李鴻章忠告致平讓出廈門致平率兵繞道赴浙李鴻章乃迎海軍入廈陸戰隊團長馬坤貞忌功奪李鴻章職以匿槍不繳逮赴馬尾全廈人民如失怙恃奔走營救海軍總長李鼎新知其寃令海軍總司令杜錫珪釋之委任為總司令部諮議官李鴻章辭不就退隱涵江李鴻章在廈日革命黨同志避匿廈門鼓浪嶼者皆陰為護庇護法之役隱為東道主招納奔亡生平敦氣誼以洪永安死河南白狼之難子孫無力建祠乃召集舊部在廈立專祠報之又建屋祠旁歲時奉祀年七十六卒

陳樵字友漁邑庠生光緒二十九年與涂開繁等在馬港立醒社書報所宣傳

革命三十年偕陳及元林翰蔡瑄等創立莆田礪青小學堂東渡日本留學
法政大學返國後仍主持礪青校政宣統元年設自治研究所與旅滬福建
學生通聲氣設支會於福州被派為調查員三年任莆田禁煙局長旬日間
閉煙肆以百計獲煙犯以千計卒因警察擾民激成罷市波及禁煙局推之
住宅燬焉省垣革命事發推乃參加學生隊與駐防旗兵相持於山事定
論功任閩侯地方廳檢察官時彭壽松驕橫排除異己為報紙抨擊壽松白
日刺殺蔣筠黃家成於市法曹瞠目相視莫敢誰何推依法檢舉卒以定讞
民國二年辭職就福建法政學校教員兼代祕書長任律師事務十一年討
賊軍入閩故主席林森任福建省長派署財政廳廳長未幾林離閩推亦辭
職陳衍立說詩社推從之遊刻苦為詩與林翰唱和卒年五十有四著有刑
事訴訟法丘園詩稿